

法華會義

C40  
4514  
(10)



C40-4514

了翁上座請大藏及有  
家書置之武州塔雲山  
我微笑塔院直府中永  
為學者不敢許出院內  
當山二世鐵牛機謹認



B 64853

妙法蓮華經台宗會義卷七之一

古吳後學満益智旭述

(丙) 約化他勸流通中。二品受法弟子。有兩品經。

妙音品。二普門品 (丁) 今先釋妙音品

妙音菩薩本事品第二十四

放光相召從東現來。而品稱本事者。因華德菩薩  
之間。具明往昔伎樂寶鉢供佛因緣果報。又明現  
一切色身三昧之用。故云本事品也。又藥王品。但  
明本行。不明遊化。普聞。但明遊化。不明本行。今

品則具明之。又藥王普門兩品由問故說。今由光召故說。彼此互彰並顯圓行。非謂有優劣也。

品文分六。初放光東召。二奉命西來。三十方弘經。四二土得益。五還歸本國。六聞品進道。

(戊)初放光東召

爾時釋迦牟尼佛放大人相肉髻光明及放眉間白毫相光徧照東方百八萬億那由他恒河沙等諸佛世界過是數已有世界名淨光莊嚴其國有佛號淨華宿王智如來應供正徧知明行足善逝世間解無

上士調御丈夫天人師佛世尊爲無量無邊菩薩大衆恭敬圍繞而爲說法。釋迦牟尼佛白毫光明徧照其國

佛是究竟人故名大人微妙淨法身具相三十二相相皆是法界故名爲大人相肉髻白毫卽大人相之二種肉髻表圓極妙果白毫表中道妙因意顯妙音菩薩果後行因與文殊不輕藥王觀音普賢等無不同也問如地涌及藥王等足可流通妙法何必遠召妙音答妙音亦與此土有緣此土衆

生宜從妙音而得四益是故召之間。十方菩薩能令此土衆生得四益者理必甚多。何故此但東召妙音西說觀音不及餘八方耶。答此有二意。一者偏召偏說于事無妨印土法華積至八里安知無此文也。二者召東說西於理亦足東表於始西表於終始表發心終表畢竟發心畢竟二不別何所不該聖不煩文舉一例諸耳。

(戊)二奉命西來二初發來之緣二正明發來 (己)

初中五初經家敘德二被照辭佛三復佛寄試

四菩薩受旨五先現來相

(庚)今初

爾時一切淨光莊嚴國中有一菩薩名曰妙音久已植衆德本供養親近無量百千萬億諸佛而悉成就甚深智慧得妙幢相三昧法華三昧淨德三昧宿王戲三昧無緣三昧智印三昧解一切衆生語言三昧集一切功德三昧清淨三昧神通遊戲三昧慧炬三昧莊嚴王三昧淨光明三昧淨藏三昧不共三昧日旋三昧得如是等百千萬億恒河沙等諸大三昧德者福慧二種莊嚴也供養諸佛敘其福慧之由

甚深智慧。敘其卽福之慧。諸大三昧。敘其卽慧之福。略列一十六名。並是圓道妙定也。實相妙體。高顯無上。無相而無所不相。名妙幢相三昧。因果不二。權實不二。本迹不二。名法華三昧。離三惑垢。證本淨性。名淨德三昧。權智照機。盈虧巧現。名宿王戲三昧。月名宿王平等大慈。不緣假名。不緣實法。名無緣三昧。一心三智印。一切法。名智印三昧。十界語言。並是因緣生法解。其一一卽空假中。一切語言。卽一語言。一語言卽。一切語言。非一非一切。而一

而一切名解。一切衆生語言三昧。在一三昧。一切三昧功德悉入其中。名集一切功德三昧。六根清淨。互用自在。名清淨三昧。自在化物遊諸世間。幻事傀儡。普攝一切。名神通遊戲三昧。平等大慧。普照昏衢。名慧炬三昧。性具萬德。緣了融通。隨舉一法。統一切法。名莊嚴王三昧。三智圓淨。照法無遺。名淨光明三昧。一念淨心。含攝萬德。名淨藏三昧。七方便人所不能入。名不共三昧。實智照理。而無所住。名日旋三昧。

(庚)二被照辭佛

釋迦牟尼佛光照其身。卽白淨華宿王智佛言。世尊。我當往詣娑婆世界禮拜親近供養釋迦牟尼佛。及見文殊師利法王子菩薩。藥王菩薩。勇施菩薩。宿王華菩薩。上行意菩薩。莊嚴王菩薩。藥上菩薩。

(庚)三彼佛寄誠

爾時淨華宿王智佛告妙音菩薩。汝莫輕彼國。生下劣想。善男子。彼娑婆世界高下不平。土石諸山穢惡充滿。佛身卑小。諸菩薩衆。其形亦小。而汝身四萬二

千由旬。我身六百八十萬由旬。汝身第一端正。百千萬福。光明殊妙。是故汝往莫輕彼國。若佛菩薩及國土。生下劣想。

妙音菩薩本迹燎然。尙煩佛誠所將眷屬。或有未達。故寄上以規下耳。佛證平等法性。爲衆生故。脫珍御弊。示卑小身及穢惡土。只此卑小穢惡身土體。卽法界。何大何小。何淨何穢。當知非小現小。非穢現穢。忍辱衣也。小原非小。穢原非穢。法空座也。以小以穢。曲順衆生。慈室也。佛旣如此。菩薩亦

然故應了達三軌。勿存勝劣情見。問此王人八尺時。佛身丈六。不過高一倍耳。彼土佛菩薩身相去一百五十餘倍。何耶。答淨土勝應之相事非一概不可例同。既是勝妙眷屬。何得有未達者。答濁輕福勝。故土淨位權智淺故須規。

(庚)四菩薩受旨  
妙音菩薩白其佛言。世尊。我今請娑婆世界。皆是如來之力。如來神通遊戲。如來功德智慧莊嚴。彼佛旣以三法寄規。妙音亦以三法受旨。皆是如

來之力者。總推功於佛力。不敢輕也。神通遊戲者。脫珍御弊。長者之身不改。忍辱衣也。功德莊嚴者。大慈悲室也。智慧莊嚴者。諸法空座也。仗此如來三力。方能往詣娑婆。然妙音自有分證三力。今顯皆仗如來究竟三力。令彼眷屬不起輕心。

(庚)五先現來相又六。初遣蓮華。二文殊問。三釋迦答。四文殊請見。五釋迦推功多寶。六多寶命來

(辛)今初

於是妙音菩薩不起于座。身不動搖而入三昧。以三

## 法華會第十五

昧力於耆闍崛山去法座不遠化作八萬四千衆寶蓮華。闍浮檀金爲莖。白銀爲葉。金劙爲鬚。甄叔迦寶以爲其臺。

## (辛)二文殊問

爾時文殊師利法王子見是蓮華而白佛言。世尊。是何因緣先現此相。有若干千萬蓮華。闍浮檀金爲莖。白銀爲葉。金劙爲鬚。甄叔迦寶以爲其臺。問。若文殊位下。則妙音辭彼佛時。不應云及見文殊。若文殊位高。則此相來。何得不識。答。縱使位高。

未階妙覺。此相不識。亦無所妨。縱使位下。別有他長。遠來求見。亦復何失。况雖同一位。有始中終。雖始中終亦同。而所得三昧境界。亦容有互未達者。彼此互資。互相得益。若同是古佛。則無復高下。妙音爲衆生得利益。故辭云求見。文殊爲大會無敢問。故發起令知也。

## (辛)三釋迦答

爾時釋迦牟尼佛告文殊師利。是妙音菩薩摩訶薩欲從淨華宿王智佛國。與八萬四千菩薩圍繞。而來

至此娑婆世界。供養親近禮拜於我。亦欲供養聽法華經。

(辛)四文殊請見

文殊師利白佛言。世尊。是菩薩種何善本。修何功德。而能有是大神通力。行何三昧。願爲我等說是三昧名字。我等亦欲勤修行之。行此三昧。乃能見是菩薩色相大小。威儀進止。惟願世尊以神通力。彼菩薩來令我得見。

(辛)五釋迦推功多寶

爾時釋迦牟尼佛告文殊師利。此久滅度多寶如來。當爲汝等而現其相。

文殊雖問功德三昧。而意在請見。故推功多寶以召其來。下文因華德重。問乃答功德及三昧也。推功多寶者。應是多寶如來昔日弟子。

(辛)六多寶命來

時多寶佛告彼菩薩。善男子來。文殊師利法王子。欲見汝身。

初發來之緣竟

(已)二正明發來七。初與眷屬經歷。二敘相登臺。三問訊傳旨。四請見多寶。五釋迦爲通。六塔中稱善。七問答往因。  
(庚)今初

于時妙音菩薩於彼國沒。與八萬四千菩薩俱共發來。所經諸國。六種震動。皆悉雨於七寶蓮華。百千天樂不鼓自鳴。

昔奉寶鉢。今得菩薩法器相隨。昔奉音樂。今得天樂相隨也。

(庚)二敘相登臺

是菩薩自如廣大青蓮華葉。正使和合百千萬月。其面貌端正。復過於此。身真金色。無量百千功德莊嚴。威德熾盛。光明照曜。諸相具足。如那羅延堅固之身。入七寶臺。上升虛空。去地七多羅樹。諸菩薩衆恭敬圍繞而來。詣此娑婆世界耆闍崛山。

(庚)三問訊傳旨

到已下七寶臺。以價直百千瓔珞。持至釋迦牟尼佛所。頭面禮足。奉上瓔珞。而白佛言。世尊。淨華宿王智佛問訊世尊。少病少惱。起居輕利。安樂行不。四大調

法華經第十五

卅

和不。世事可忍不。衆生易度不。無多貪欲瞋恚愚癡  
嫉妒慳慢不。無不孝父母不敬沙門。邪見不善心不  
攝五情不。世尊。衆生能降伏諸魔怨不。久滅度多寶  
如來在七寶塔中來聽法不。已上俱傳淨華宿王佛言。又問訊多寶如來。安隱少惱堪忍久住不。

庚四請見多寶

世尊。我今欲見多寶佛身。惟願世尊示我令見

庚五釋迦爲通

爾時釋迦牟尼佛語多寶佛。是妙音菩薩欲得相見

庚六塔中稱善

時多寶佛告妙音言。善哉善哉。汝能爲供養釋迦牟尼佛。及聽法華經。并見文殊師利等故。來至此稱善。即是相見已竟。不須開塔也。

庚七問答往因又二。初問。二答

辛今初

爾時華德菩薩白佛言。世尊。是妙音菩薩種何善根。修何功德。有是神力。

妙音即是淨德夫人後身。華德即是妙莊嚴王後身。本是宿世大善知識。故今爲衆請問。顯其功德。

也

(辛)二答

佛告華德菩薩。過去有佛名雲雷音王。多陀阿伽度阿羅訶三藐三佛陀。國名現一切世間。劫名喜見。妙音菩薩於萬二千歲。以十萬種伎樂。供養雲雷音王佛。并奉上八萬四千七寶鉢。以是因緣果報。今生淨華宿王智佛國。有是神力。華德於汝意云何。爾時雲雷音王佛所妙音菩薩。伎樂供養奉上寶器者。豈異人乎。今此妙音菩薩摩訶薩是華德。是妙音菩薩已。

會供養親近無量諸佛。久植德本。又值恒河沙等百千萬億那由他佛。

二奉命西來竟

(戊)三十方弘經二。初正明現身說法。二問答所住三昧。(己)今初

華德汝但見妙音菩薩其身在此。而是菩薩現種種身。處處爲諸衆生說是經典。或現梵王身。或現帝釋身。或現自在天身。或現大自在天身。或現天大將軍身。或現毘沙門天王身。或現轉輪聖王身。或現諸小

1 2 3 4 5 6 7 8 9 70 1 2 3 4 5 6 7 8 9 80 1 2 3 4 5 6 7 8 9

王身。或現長者身。或現居士身。或現宰官身。或現婆羅門身。或現比丘。比丘尼。優婆塞。優婆夷身。或現長者居士婦女身。或現宰官婦女身。或現婆羅門婦女身。或現童男童女身。或現天龍夜叉。乾闥婆。阿修羅。迦樓羅。緊那羅。摩睺羅伽人。非人等身。而說是經。諸有地獄餓鬼畜生。及衆難處。皆能救濟。乃至於王後宮。變爲女身。而說是經。華德。是妙音菩薩能救護娑婆世界諸衆生者。是妙音菩薩。如是種種變化現身。在此娑婆國土。爲諸衆生。說是經典。於神通變化智。

慧無所損減。是菩薩以若干智慧明照娑婆世界。令一切衆生各得所知。於十方恒河沙世界中。亦復如是。若應以聲聞形得度者。現聲聞形而爲說法。應以辟支佛形得度者。現辟支佛形而爲說法。應以菩薩形得度者。現菩薩形而爲說法。應以佛形得度者。卽現佛形而爲說法。如是種種隨所應度而爲現形。乃至應以滅度而得度者。示現滅度。華德。妙音菩薩。摩訶薩成就大神通智慧之力。其事如是。

示現三十四凡身。四聖人身。結成六道。于法界耳。

法華經卷十五

九

此明菩薩以難思力隨類通經物覩其迹不測其本。但甘其味勿擇其形也。

(巳)二問答所住三昧又二初問二答

(庚)今初

爾時華德菩薩白佛言世尊是妙音菩薩深種善根世尊是菩薩住何三昧而能如是在所變現度脫衆生

深種善根領前寶鉢伎樂供佛之事住何三昧正問現十界身弘法之由也

(庚)二答

佛告華德菩薩善男子其三昧名現一切色身妙音菩薩住是三昧中能如是饒益無量衆生

三十方弘經竟

(戊)四二土得益

說是妙音菩薩品時與妙音菩薩俱來者八萬四千人皆得現一切色身三昧此娑婆世界無量菩薩亦得是三昧及陀羅尼

三昧及陀羅尼體一而用異寂用名三昧持用名陀羅尼又色身變現名三昧音聲辨說名陀羅尼

1 2 3 4 5 6 7 8 9 70 1 2 3 4 5 6 7 8 9 80 1 2 3 4 5 6 7 8 9

祇是圓定圓慧耳。既現身必能說法。謂無次第亦可。據藥王品中先得三昧焚身供佛乃得總持謂有深淺亦可。今約二土言之。俱來菩薩是淨土人福勝于智故但得三昧。此界菩薩是穢土人忍智力強故兼得總持。

(戊)五還歸本國

爾時妙音菩薩摩訶薩供養釋迦牟尼佛及多寶佛塔已還歸本土所經諸國六種震動雨寶蓮華作百千萬億種種伎樂既到本國與八萬四千菩薩圍繞

至淨華宿王智佛所。白佛言世尊我到娑婆世界饒益衆生見釋迦牟尼佛及見多寶佛塔禮拜供養又見文殊師利法王子菩薩及見藥王菩薩得勤精進力菩薩勇施菩薩等亦令是八萬四千菩薩得現一切色身三昧。

(戊)六聞品進道

說是妙音菩薩來往品時四萬二千天子得無生法忍華德菩薩得法華三昧

得無生忍開佛知見也得法華三昧增道損生也

華德正是當機。故得益倍深。天子先已根淨。今悟  
圓因。故知正說流通節節皆有種熟脫益。功用不  
殊也。釋妙音品竟

①次釋普門品

觀世音菩薩普門品第二十五

觀者能觀之智。卽一心三智也。世音者所觀之境。  
卽十法界機也。境智雙舉。感應合標。故名爲觀世  
音。菩薩義如前釋。普者徧也。門者能通義也。用一  
實相開十普門。無所障闇。故稱普門。釋此爲二。初

通次別。通釋又四。初列名。二次第三解釋。四料簡。  
初列名者。一人法。二慈悲。三福慧。四真應。五藥珠。  
六冥顯。七權實。八本迹。九緣了。十智斷也。二次第  
者又有兩意。一約觀明次第。二約教明次第。約觀  
者。欲明觀行。必有其人。人必秉法。故最居初。次慈  
悲者。良由觀音之人。觀於實相普門之法。達於非  
人非法實相之理。了知一切衆生亦復如是。故華  
嚴云。心佛及衆生。是三無差別。此理圓足。無有缺  
減。云何衆生理具情迷。顛倒苦惱。旣觀是已。卽起

慈悲誓願拔苦與樂也。次福慧者。初人法相成此據其信。次慈悲與拔此明其願。欲滿此願。必須修行。修行不出福慧。慧卽般若。福卽五度。互相資導。以行順願。事理圓足。則能與拔也。次真應者。福慧具足。契於法性。法性卽實相。名爲法身。法身旣顯從真起應也。次藥珠者。證得真應。俱能益物。破三惑病。如藥樹王。雨三諦寶。如如意珠王也。次冥顯者。衆生機感。二身應之。或冥或顯。得益不同也。次權實者。得益不同。皆由二智之力。不失其宜也。次本迹者。雖巧用二智利益。一切而優降不同。良由本迹。或本迹俱高。或本高迹下。則二智必優。若本下迹高。或本迹俱下。則二智必降也。次緣了者。上明行人發心修行。從因尅果化他。利物深淺不同。從人法至真應。是自行次第。從藥珠至本迹。是化他次第。皆是順論。未是郤討根本。今原其性德種子。若是觀智之人。悲心誓願。智慧莊嚴顯出。真身莊嚴顯出。應身皆是緣。因爲種子也。次智斷者。旣

却討其根源乃順論其究竟始則起自了因終則菩提大智始則起自緣因終則涅槃斷德也。二約教明次第者又有通別通者五時四教各可論十隨法義立不可深窮且如三藏十雙攬五陰名爲人諦緣度名爲法聲聞法緣菩薩生緣名爲慈悲聲聞三學菩薩六度名爲福慧五分法身爲真作意神通爲應治四住病爲藥雨三乘寶爲珠見聞獲益爲顯不見不聞爲冥稱真爲實隨情爲權自證爲本示現爲迹一句一偈爲了三業微善爲緣

盡無生智爲智有餘無餘爲斷聲聞漸證菩薩頓成三藏尚備通別可知不暇廣述也別者歷五味以明多少不同如乳味頓教教名大方廣佛華嚴大方廣是法佛即是人此人秉法必具慈悲因華嚴即是福慧二嚴嚴于果德即是真應既能利物必辨藥珠物得其益必有冥顯而權實本迹緣了智斷通論則有別論則無何以故佛一期化物明于頓漸今華嚴頓說漸教未彰故不明四意也小隔于大如聾如瘡覆于此權未顯其實故無權實未

發王宮生身之迹。未發寂場法身之迹。未顯久遠  
久遠久成之本。故無本迹。不言小乘本有性德緣  
了之因。當尅智斷本具之果。故無後二意也。次酩  
味三藏教。但明人法慈悲福慧三義。無真應等七  
義。何以故。灰身滅智。那得從真起應。既無真應。將  
何益物。又縱約真諦通論。有十而菩薩三祇伏惑  
亦不得論真應等也。次生酥方等教。對小明大。得  
有中道大乘人法乃至冥顯兩益。然猶帶方便調  
熟衆生。故不得說權實等四意也。次熟酥般若教。

雖已會小乘之法。皆摩訶衍。猶未會小乘之人。亦  
帶方便故。亦止有六義。未明權實等四意也。今醒  
醐法華教。則會小乘之人。汝實我子。我實汝父。汝  
等所行。是菩薩道。開權顯實。開迹顯本。了義決定。  
不相疑難。得明中道人法。乃至本迹八意。三世諸  
佛調熟衆生大事。因緣究竟圓滿。備在此經。故二  
萬燈明。但說法華。卽便息化。迦葉如來。亦復如是。  
若涅槃教。則爲鈍根弟子。于法華經未能悟入。所  
以郤討源由。廣說緣了。明三佛性。性德了因種子。

修得卽成三般若智德菩提性德緣因種子修得  
卽成三解脫斷德涅槃性德非緣非了卽是正因  
修得成就則是不縱不橫三點法身故知涅槃所  
明郤說八法之始終成智斷十義具足既歷五味  
以論十法次第約四教則可解也又華嚴六意於  
利人成醍醐於鈍人成乳三藏三意於利人密去  
亦成醍醐於鈍人成酪方等六意於利人成醍醐  
於鈍人成生酥般若六意於利人成醍醐於鈍人  
成熟酥若法華八意於鈍人亦成醍醐也二次第

竟三解釋者初釋人法人卽假名衆生法卽五陰  
實法法是能成人是所成此之人法通于凡聖若  
色受想行識是世間法攬此成生死凡人若戒定  
慧解脫解脫知見是出世法攬此成出世聖人故  
大論云衆生無上者佛是法無上者涅槃是然雖  
通凡聖不無差別上中下惡卽成三塗之人法上  
中下善卽成三善道之人法故有六趣階差若更  
細論百千萬品出世人法亦復不同若三藏有門  
觀衆生我人如龜毛兔角畢竟不可得但有五陰

之法乃是人空法不空。諦觀此法無常生滅。能伏見愛發生煬頂等位。善有漏五陰。卽攬此方便之法成似道賢人。若發真無漏戒定慧等。卽攬此無漏之法成四果聖人。若不聞法。率實教任運餘依滅已。灰身泯智。自謂入于無餘涅槃。人法都寂。其實生在外方便有餘土中。攬彼法性色受想行識之法成彼土假名之人。空門觀五陰和合假名爲人。三假浮虛會入空平。發生煬頂等。例如前說餘二門亦如是。若摩訶衍中明人法者。亦不言人。

空法不空亦不言攬。實法體成假人用。但觀陰界入法及假名人。性本自空非滅故空。故大品云。色性如我性。我性如色性。始從初心終于後心。常觀人法俱空。此復爲三。一者但觀二空發生似解。卽攬如幻善有漏法成性地如幻之人。次發真解斷見思惑。卽攬如幻無漏戒等成見地等如幻之人。而根鈍故但見於空不見不空。還與三藏同其灰斷不覺生在方便有餘土中。攬彼土法成彼土人。若根利者旣發真已。不但見空兼見不空。了知人。

法二性不可斷滅則接入別圓也。二者了知生死人法出世人法名爲二邊而實相法性非人非法非世出世其體常住爲欲證此實相體故先觀生死人法本空斷見思惑卽攬方便五陰成十住假名之人次觀出世人法本空不住出世無漏道中斷塵沙惑卽攬方便五陰成十行假名之人次觀二邊人法皆空不住二邊伏無明惑卽攬方便五陰成十迴向假名之人次發中道真明破無明惑卽攬實報土常住五陰之法成十地菩薩常住假

1 2 3 4 5 6 7 8 9

1 2 3 4 5 6 7 8 9

1 2 3 4 5 6 7 8 9

法成無上衆生號之爲佛故知觀法空是緣因種也。以觀人法空卽識三種佛性故大經云。衆生佛性不卽六法不離六法不卽者明正因佛性非陰非我。非陰故非法非我故非人。非人故非了。非法故非緣故言不卽六法也不離六法者不離衆生空而有了因。不離五陰空而有緣因故言不離六法也。佛從初發心觀人法空修三佛性歷六卽位成六卽人法。今觀世音普門未是究竟之人法。卽是分證之人法。前一番問答是分釋無上之人稱。

觀世音後一番問答是分釋攬無上之法故稱普門當知人法因緣故名觀世音菩薩普門品也。二釋慈悲悲名愍傷慈名愛念愍故拔苦念故與樂然但起慈悲心不牢固須發弘誓加持使堅譬如工匠造物節解雖復相應若無膠漆則有零落。誓願如膠要心不退悲心愍傷拔於世間苦果集因興兩誓願所謂衆生無邊誓願度煩惱無盡誓願斷慈心愛念欲與出世道因滅果之樂興兩誓願所謂法門無量誓願學佛道無上誓願成但前明。

人法凡聖不同。今辨慈悲大小亦異。若三藏事六度行人觀分段生死八苦。菩度無邊衆生。觀見思顛倒結業誓斷無盡煩惱。觀此因果無常生滅念念流動而修對治誓學無量法門。觀于真諦無爲之理。誓成無上佛道。如此慈悲卽緣有作四諦所起也。若通教行人觀生死八苦如幻如化。衆生顛倒謂爲真實。卽起誓願度如幻衆。貪恚癡等如幻化。衆生顛倒爲之受惱。卽起誓願斷如幻惑。觀卽色是空以如幻故。乃至卽識是空。卽貪瞋癡等

是空以如幻故。非滅故。空性本自空。空亦不可得。而衆生不能了知。卽空。卽起誓願學如幻法門。又觀涅槃設有一法過涅槃者。我亦說如幻化。而衆生謂有佛道可求計。著佛想。卽起誓願成如幻覺。覺如幻衆。如此慈悲是緣無生四諦所起也。若別教行人觀于因緣生法。假名無量十界森羅。應須分別導利衆生。那得沉空取證。觀此苦果非止一種。分段變易皆名爲苦。卽起誓願度九界生無量之苦。由無量集所謂二惑五住。浩若塵沙。卽起誓

願度九界集。集既無量。治亦無量。所謂三止三觀。法門。卽起誓願。徧學徧行。治既無量。滅亦無量。所謂四種涅槃。六種無爲。卽起誓願。令他同證。如此慈悲。是緣無量四諦所起也。若圓教行人。觀一切法實相真如圓融法界。非違非順。非明非闇。而無明闇。故則違違之則有苦。集因果。智慧明。故則順順之。則有道滅因果。緣此違順因果而起弘誓。譬如磁石。不作心想。任運吸鐵。慈悲亦爾。不作衆生。及以法想。任運拔苦與樂。故名無緣大慈大悲菩薩。

薩從初發心修此無緣慈悲。歷六卽位。躋于究竟。今前一番問答。明大悲拔苦。一心稱名。卽得解脫。後一番問答。明大慈與樂。現身說法。皆令得度。當知以大慈大悲因緣。故名觀世音普門也。三釋福慧。亦名定慧。寂照妙智。無幽不朗。如明鏡高堂。福德禪定。純厚資發。如明燈淨油。亦稱目足。目足兩備。入清涼池。池卽涅槃。涅槃稱爲二種。莊嚴莊嚴法身。釋此定慧。亦有多種。三藏以無常觀理爲慧。以觀練熏修種種事。禪爲福。以定資慧。發真無漏。

所證天然真理名爲法身。通教但以體法異于析法。餘悉同于三藏別教。則以緣修智慧與諸禪定助開中道法身。圓教則以實相觀智爲慧。實相寂定爲福。共顯非定非慧之理。名爲實相法身。菩薩從初發心。修此不二定慧。歷六卽位。隣于究竟。今前問答。智光照闇。應機拔苦。是從慧莊嚴以得名。後問答。首楞嚴定。普現色身。是從福莊嚴以得名。當知以福慧因緣故名。觀世音普門也。四釋真應真名。不僞不動。應名稱適根緣。若契實相。不僞不

動之理。卽能稱機適緣而應。譬如攬鏡。形對影呈此之真應。不得相離。若外道修有漏通。雖能變化。譬如瓦石光影。不現不可名應。未破四住。未顯偏真。那有中道圓真。若二乘作意神通。亦不名應。譬如圖畫。作意乃成了。不相似。但證偏真。出于三界。不達中道。不動之理。故非圓真。從何起應。大乘不爾。得實相真。譬得明鏡。不須作意。法界色像隨對。隨應。如鏡寫像。與真不殊。爾乃名爲真寂。身應菩薩。從初發心。歷六卽位。隣于究竟。今前問答。明真

寂不動法界獲益是從真身得名。後問答明隨機廣利出沒多端是從應身得名。當知以真應因緣故名觀世音普門也。五釋藥珠藥樹王療治苦患出柰女經如意珠王能雨衆寶廣出諸經三藏通別亦各得明治病雨寶而所治不偏所雨不普今約圓敎明之如華嚴云有上藥樹其根深入枝葉四布根莖枝葉皆能愈病見聞喚觸無不得益菩薩亦爾大悲熏身形聲利物名大藥王身又如如意珠王能雨大千珍寶隨意無盡菩薩亦爾大慈

熏身與衆生樂名如意珠王身此亦約六卽判位今前問答偏救種種幽厄苦難從藥王身得名後問答稱適所求雨大法雨皆令得度從如意珠王身得名當知以二身因緣故名觀世音普門也。六釋冥顯兩益冥是冥密顯是顯露大聖恒以二益利安一切而衆生及與下地日用不知譬如日月照世盲雖不見實荷深恩乃至同是一位而下品不知上品神力所作以不知故名爲冥益又聖人之益雖不可知若聖欲使知雖蜺蟲等亦能知之。

以使知故名爲顯益。此亦約六卽判位。今前問答。不見形聲密荷深祐。卽是冥益。後問答。覩所現身。聞所說法。卽是顯益。當知以冥顯因緣。故名觀世音普門也。七釋權實。權是暫用實非暫用。略言權實。共有三種。一自行權實。中觀爲實。二觀爲權。二化他權實。他人根性不同。或說權爲實。或說實爲權。不可定判。但約他意以明權實耳。三自行化他。合明權實。自行有權有實。皆束爲實。化他亦有權有實。總束爲權。用此三意廣歷四教。復就自行權

實以判六卽。如玄義及方便品所明。可以意得。今前問答。從自他合明之實智益物。後問答。從自他合明之權智益物。當知以權實因緣。故名觀世音普門也。八釋本迹。本名實得。迹名應現。自有本高迹下。本下迹高等四句。事非一概。亦約六卽判位。今前問答。不可見聞。但獲冥祐。是從本地得名。後問答。應現殊形。說法度脫。是從迹地得名。當知以本迹因緣。故名觀世音普門也。九釋緣了。了是顯發緣。是資助。資助于了。顯發法身。了者。卽是般若。

亦名慧行。亦名正道。亦名智慧莊嚴。緣者即是解脫。亦名行。亦名助道。亦名福德莊嚴。大論云。一人能耘。一人能種。種譬緣因。耘譬了因。通論四教。皆具緣了二義。今正明圓教二種莊嚴之因。佛具二種莊嚴之果。原此因果根本。即是性德緣了。此之性德本自有之。非適今也。大經云。一切諸法本性自空。亦由菩薩修習空故。見諸法空。此卽了因種子。本自有之。又云。一切衆生。皆有初地味禪。思益云。一切衆生。卽滅盡定。此卽緣因種子。本自有之。

之。依此法爾本有緣了種子。方便修習漸漸增長。從於毫末。得成合抱大樹。所謂摩訶般若首楞嚴定。此一科不論六卽。但論根本性德。今前問答。從了種受名。後問答從緣種受名。當知以了因緣因緣故名。觀世音普門也。十釋智斷。通途爲語。則智卽有爲功德滿。亦名菩提。斷卽無爲功德滿。亦名涅槃。言有爲功德者。卽是因時智慧有照用修成之義。故稱有爲。因雖無常而果是常。將因名果。故言有爲功德滿也。言無爲功德者。若小乘。但取

0 1 2 3 4 5 6 7 8 9 10 11 12 13 14 15 16 17 18 19 20

煩惱滅無以爲斷德。則是但離虛妄名爲解脫。其實未得一切解脫。乃無體之斷德也。大乘是有體之斷。不取滅無以爲斷德。但取隨所調伏衆生之處。惡不能染。縱任自在。無有累縛。名爲斷德。指此名無爲功德。故淨名云。不斷癡愛。起諸明脫。又云。於諸見不動。而修三十七品。愛見爲侍者。亦名如來種。乃至五無間。皆生解脫相。無所染礙。名爲一切解脫。即是斷德無爲也。寂而常照。卽智德也。小乘灰身滅智。旣無其身。將何入生死。而論調伏。無乘灰身滅智。旣無其身。將何入生死。而論調伏。無

礙無染。旣無其智。何所照寂。大乘智斷圓極。故法身顯著。卽是三種佛性義圓也。法身滿足。卽是非因非果正因滿足。故曰隱名如來藏。顯名法身。雖非是因。而名爲正因。雖非是果。而名爲法身。大經云。非因非果。名爲佛性。卽是此正因佛性也。又云。是因非果。名爲佛性。此據修得緣了。皆滿了。滿轉名般若。亦名大菩提果。緣滿轉名解脫。亦名大涅槃果。果皆稱爲果也。佛性通于因果。不縱不

橫性德時三因不縱不橫。果滿時名三德亦不縱不橫。故普賢觀云。大乘因者諸法實相。大乘果者亦諸法實相。智德既滿。湛然常照。隨機卽應。一時解脫。斷德既滿。處處調伏。現形說法。皆令得度。今前問答從智德分滿受名。後問答從斷德分滿受名。當知以智斷因緣。故名觀世音普門也。三解釋竟。四料簡者。一料簡人法。問。若人對觀音法。對普門者。則方等有普門法。王子標於人名。此義云何答。此有二義。一者人非法法非人。二者人卽法法。

卽人。若約華嚴。自有二意。一者不次第意。人卽實相。實相卽人。人法不二也。二者次第意。地前生死行人。未是實相之法。此法亦非彼人也。若約三藏。有門明無假人。但有實法。此法非人。空門明攬實法。以成假人。亦人法兩異。縱令不離人論法。不離法論人。俗有真無。亦界內二諦意耳。非中道之人法也。若約方等對小明大論人法者。小同三藏。大同華嚴。般若涅槃亦爾。今方等中明普門法。王子卽大乘意。與此經同。此經普門是法。何得有法無

人方等普門是人。何得有人無法。但人法互舉耳。  
 二料簡慈悲問。若大悲拔苦苦除即是得樂。若大  
 慈與樂樂至即是拔苦。何意兩分答。通論如此。別  
 則不然。譬如拔罪于獄。未施五塵。身雖免痛根情  
 未娛。不名與樂。又如施五塵于獄中。五情雖悅不  
 名拔苦。爲從別義。各顯一邊故別說之。復次外道  
 修四無量自證禪定。作想虛運。彼無實益。不能令  
 他拔苦得樂。雖自獲定虛妄世法報盡還墮。不免  
 于苦。自他俱無利益。二乘修四無量。但自拔分段

苦。未免變易。非究竟樂。亦不益他。菩薩不爾。非凡  
 夫行。非賢聖行。非凡夫者不同。自受禪樂。非賢聖  
 者不同。自拔于苦。不同自受樂故。卽與他樂。不同  
 自拔苦故。卽拔他苦。亦是卽拔苦。卽與樂。卽與樂  
 即拔苦。但分別說之前明拔苦。後明與樂耳。又但  
 論慈悲不論喜捨者。四無量心名雖有四義。但有  
 三。大經云。憂畢又憂畢。又名捨。卽是兩捨。非慈非  
 悲。不二之意。不二而二。卽是慈悲。喜者從樂生喜。  
 初願與樂。衆生苦重。不能得樂。則無可喜。旣拔苦

竟。卽能得樂。遂其初願。是故喜也。三料簡福慧。問何故觀音此妙慧稱之而拔苦。普門對福見之而得樂。答。慧是光明。正治闇惑。惑是生死苦惱。欲治闇惑之苦。豈不用智慧之光。故稱智慧人名。卽拔苦也。法是法門。門名能通。通至涅槃安樂之處。初習此法。是得樂。因後證此法。是得樂果。故對普門法而明與樂也。然自有智慧。是福德。福德是智慧。自有智慧。非福德。福德非智慧。大小乘皆備四句。小乘四句者。如六度菩薩修般若分闇浮提爲七分。

此是世智。不能斷惑。猶屬福德所攝。是第一句。卽名此福是智。以息諍故。是第二句。如餓阿羅漢。以能斷惑。名爲智慧。而非福德。卽第三句。如白象王。有大受用。名爲福德。非出世智。亦非世智。不名智慧。卽第四句也。大乘四句者。別教地前三十心行。行名福德。慧行名智慧。此慧不能破無明。還屬福德所攝。卽第一句。此福亦能治取相惑。亦可名爲智慧。卽第二句。若地上皆名智慧。不名福德。卽第三句。若地前皆名福德。不名智慧。卽第四句也。今

圓教所明。福卽是慧。慧卽是福。福慧不二。故大論云。如是尊妙人。則能見般若。此慧那得無定。又云。健相三昧能破強敵。此定那得無慧。不二而二。故分別說之耳。四料簡真應亦有四句。非真非應。應而非真。真而非應。亦真亦應。一非真非應。就理可解。又凡夫不見理。故非真。無用故非應。二應而非真者。外道修得五通。同他施化。亦得名應。而不見諦。不得名真。三真而非應者。二乘斷結見諦。亦得名真。灰身滅智不能起應。四亦真亦應者。此則別

顯中道爲真。卽真論用爲應。真應不二。不二而二。故依文互舉。一往言之。前番問答明真身恒益。後番問答明應身間益。然恒間亦不相離。如二鳥雙遊。故盡理而言。則真身亦恒。亦不恒。應身亦間。亦不間也。五料簡藥珠。藥有差病拔苦之功。亦有全身增命致寶之用。如意珠王。非但雨寶。亦能除病。大施太子入海得珠。還治父母之眼。大品云。若人眼痛。珠著身上。病卽除愈。故知通具二義。今亦別據一邊說耳。六料簡冥顯兩益。共有三十六句。如

玄義。七料簡權實亦具四句。或因實智解脫于權。七難銷除。二求願滿是也。或因實智解脫于實。三毒皆離是也。或因權智得度于權。怖畏急難之中能得無畏是也。或因權智得度于實。三十三身得度是也。或因權智得度于權。怖畏急難之中能得無畏是也。或二俱度脫。或二俱不度不脫。今依文互出一邊。前文脫權後文度實耳。八料簡本迹。通論本迹俱能與拔。故壽量品云。聞佛壽無量得無量無漏清淨之果報。即是從本得樂。請觀音經云。或遊戲地獄。大悲代受苦。即是從迹拔苦。但衆生不

達本源。所以流轉苦惱。若識本理。卽于苦得解脫。不見迹化。不能三業種福。若遇形聲。卽爲致樂之因。故亦一往說之。然非本無以垂迹。非迹無以顯本。則是二而不二。問。本迹與真應何異。答。真應就一世橫辨。本迹就三世豎論也。九料簡緣了。問。緣了既有性德善。亦有性德惡。否。答。具。問。闡提與佛斷何等善惡。答。闡提斷修善盡。但性善在佛。斷修惡盡。但性惡在問。性德善惡何不可斷。答。性之善惡。但是善惡法門。性不可改。歷三世。無誰能毀。亦

復不可斷壞。譬如魔雖燒經。何能令善法門斷盡。  
假令佛燒惡譜。亦不能令惡法斷盡。如秦焚典坑。  
儒豈能令善惡斷盡耶。問。闡提不斷性善。還能令  
修善起。佛既不斷性惡。亦還令修惡起耶。答。闡提  
既不達性善。由不達故。還爲善所染。所以修善得  
起。廣治諸惡。佛雖不斷性惡。以達惡故。于惡自在。  
故不爲惡所染。永無修惡。復能自在廣用諸惡法。  
門化度衆生。終日用之。終日不染。不染故不起。那  
得以闡提爲例。設使闡提能達此善惡者。則不復

名一闡提也。十料簡智斷。此是一法異名。不得相  
離。如人被縛。運力得脫。運力名智。釋然繫外名斷。  
運力屬心。故名智慧莊嚴。釋然繫外屬身。故名福  
德莊嚴。今經言說不得一時。故互舉智斷。若深得  
此十義意者。解一千從。廣釋觀世音普門。義則不  
可盡也。初通釋竟。次別釋爲二。先釋觀世音。次釋  
普門。先釋觀世音者。以何因緣名觀世音。通釋如  
前。別則以境智因緣。故名觀世音也。境智有二。一  
思議境智。二不思議境智。一思議境智又二。一約

理外。二約理內。理外境智共。有四句。一天然境智。二相待境智。三因緣境智。四絕待境智。天然境智者。境自是境。其性常爾。智自是智。性亦常爾。非佛天人所作。故名天然。卽諸法自生句也。相待境智者。境不自境。待智故境。智不自智。待境故智。故名相待。卽諸法他生句也。因緣境智者。非但由境故境。亦非但由智故境。以境因智緣故。而有其境。非但由智故智。亦非但由境故智。以智因境緣故。而有其智。故名因緣。卽諸法共生句也。絕待境智者。

非由境故境。非由智故境。非由境智因緣和合故境。名絕待境。非由智故智。非由境故智。非由智境因緣和合故智。名絕待智。卽諸法無因生句也。今當次第破之。若境自是境者。不應爲智所照。若智自是智者。不應得照于境。今旣境爲智照。則境不自境。智能照境。則智不自智。云何妄計爲天然耶。若待智故境者。境從智生。境應名智。何得名境。如人祇應生人。不應生木石等。又若境從智生。則無智時。亦應無境。又若境從智生。則智復從何生。待

境故智亦如是破。云何妄計爲相待耶。若境因智緣故境者爲境中有境故藉智緣爲境中無境而藉智緣爲智中有境而藉境因爲智中無境而藉境因。若境中有境則不須藉智方有。若智中有境則不須藉境方有。又設各有而仍相藉則一時應有二境。若境中無境則雖藉智亦不應有。若智中無境則雖藉境亦不應有。譬如一沙無油雖合多沙亦不出油。一盲不見雖合多盲亦不能見也。智因境緣故智亦如是破。云何妄計爲因緣耶。若非

由境故境等者從因緣尚不可得况無因緣而可名境智亦如是。一往謂絕理而窮之不成絕待以其謂有無因緣之境故以其謂有無因緣之智故云何妄計爲絕待耶。此等並是心行理外妄想推計戲論分別終無實義故中論云諸法不自生亦不從他生。不共不無因是故知無生那得如前四種計執隨執一種自謂是實謂餘是妄見愛生著迷于四諦八十八使浩然無涯方招苦果流轉不息雖傍經論引證文言如蟲餌木偶爾成字實不

能解是字非字。以不解故。從于境智而起見執。如服甘露傷命早夭。故名理外境智爲龍樹之所破。今不取此爲境智。以釋觀世音也。理內思議境智者。亦復作上四門。然名字雖同。而觀智淳熟。不生執見。畢故不造新成。方便道發生緩頃。乃至十六心眼智明覺豁然得悟。破諸見惑。與理相應。譬如盲人。金鉗抉膜。灼然不謬。此之真觀。名之爲智。所照之理。名之爲境。以發無漏。故稱理內境智。雖見此理。終是作意入真。故名思議境智。今明觀世

音亦不從此境智因緣得名也。二不思議境智者。境智雖非自他共無因等。而以四悉檀赴緣假名字說。或說境自是境。智自是智。令他歡喜生善滅惡入理。或說由智故境。由境故智。或說因緣境智。或說絕待境智。令得四益。亦復如是。若無四悉檀益。諸佛如來不空說法。雖作四說。無四性執。無執故。無見愛。衆生聞者。如良馬見鞭影。卽能破惑入道。故名爲智。此智所照。名之爲境。若以智照境入空。取證成真。諦理內思議境智。如前所說。若不以

空爲證。知此境智。但有名字。名爲境智。是字不在內外中間。是字不住。亦不不住。是字無所有故。雖作四句明境智。實不分別四句境智。雖作四句聞境智。實不得四句境智。雖體達四句境智。實不作四句思量。境智言語道斷。心行處滅。不可四句思惟圖度。故名不思議境智。金光明云。不思議智。照不思議境。此如玄義境妙智妙中廣說。今言觀者。卽是不思議智。言世音者。卽是不思議境。若從文便宜先釋智次釋境。若從義便。須先明世音境次。

論觀智世者有三。一陰世間。二衆生世間。三國土世間。旣有實法。卽有假人。假實正成。卽有依報。故名三種世間也。世是隔別之義。卽十法界之世。亦是十種五陰。十種假名。十種依報。隔別不同。故名爲世間。是間差之義。三十種世差別。不相謬亂。故名爲間。言十法界者。各各有因。各各有果。故名爲法。各各有界。畔分齊故名爲界。今就一法界復有十法。所謂如是相性。體力。作因緣果報。本末究竟等。十界卽有百法。十界相互。卽有千法。如是千

1

2

3

4

5

6

7

8

9

10

11

12

法皆是因緣生法。六道是惑因緣法。四聖是解因緣法。故大經云。無漏亦有因緣。因滅無明。則得熾然三菩提燈。是諸因緣生法。當體即是三諦。故中論云。因緣所生法我說即是空。亦名爲假名。亦名中道義。故明十種法界。三十種世間。即是所觀境也。此境復爲二。所謂自他。他者謂衆生及佛。自者卽心而具。如華嚴云。心如工畫師。造種種五陰。一切諸世間莫不由心造。又云。如心佛亦爾。如佛衆生然。心佛及衆生是三無差別。是故隨舉一念心。

卽具三十世間三千性相。隨舉一佛法。亦卽具三十世間三千性相。隨舉一衆生法。亦卽具三十世間三千性相。當知若自若他。一一無非三諦不思議妙境也。音者卽十法界口業之機。界旣不同。音亦有異。發音成聲。卽備三業。以此三業而爲機感也。結此世音之境。卽應爲六。一結十法界是因緣境。二結爲四諦境。三結爲三諦境。四結爲二諦境。五結爲一實諦境。六結爲無諦境。具如玄義廣明。次明觀智者。傍境明智則有五番論觀。若就因緣

論四種觀。若就四諦亦四種觀。若就三諦。有二種觀。若就二諦。有七種觀。若就一實諦。唯一種觀。若無諦。則無觀。此亦具如玄義廣明。今且約十界以明二種三諦。一通。二別。通論者。十界皆是因緣生法。一一無不卽空。卽假。卽中。空是真諦。假是俗諦。中是中道第一義諦。別論者。六凡界是因緣生法。二乘界是空。菩薩界是假。佛界是中。境諦既有通別二意。對境明觀。亦爲二意。一次第三觀。二一心三觀。次第者。如瓔珞云。從假入空。名二諦觀。從空

入假名平等觀。二觀爲方便得入中道第一義觀。此之三觀。卽大品所明三智。一一一切智。二道種智。三一切種智。通論則觀智。但是一法異名。別論則因時名觀。果時名智也。大經明十二因緣。有四種觀。謂下智。中智。上智。上上智。析空爲下。卽藏教體空爲中。卽通教。從空入假爲上。卽別教。中道正觀爲上上。卽圓教。當知析體二觀。皆是一切智攝。若以三智四觀對五眼者。肉眼天眼照粗細事。皆是世智。悉爲諸觀境木。慧眼對空觀。一切智法眼對

1 2 3 4 5 6 7 8 9

10 1 2 3 4 5 6 7 8 9

80 1 2 3 4 5 6 7 8 9

假觀道種智。佛眼對中觀一切種智也。中論偈因緣所生法句爲觀智之本。後三句如次對三智。若對四教。則初一句卽對藏教。後三句如次對通別圓。所以對四教者。若無教。卽無觀。稟教修觀得成于智。所以須明教也。教必有主。主即是佛。或可一佛說四教。或可示四相明四佛。旣四教有四佛。卽應有四補處菩薩輔佛弘此四教。若言諸法寂滅相。不可以言宣。則生生尚不可說。何況生不生等。若言有因緣故。亦可得說。非但生生可說。乃至不

生不生亦可得說。以佛教門。出生死苦。不得一向執無說也。三藏教補處者。百劫種相好因。伏惑未斷。僅可對聲聞忍位。但以六度行成誓願。將滿慈悲熏于衆生。亦能拔苦與樂。卽是約因緣生法世智。觀于六道世間之音名觀世音也。通教補處者。觀真斷結不住于空。從空出假道觀雙流遊戲神通淨佛國土。卽是用體空一切智觀于六道世間之音名觀世音也。別教補處者。十住斷見思惑成一切智。十行四教四門觀假斷塵沙惑成道種智。

60123456789

十回向習中觀伏無明。初地斷一分無明分成一  
切種智。十地後心無明將盡。灌頂受職大慈大悲  
普熏法界。隨有機感皆能與拔。即是用次第三智  
觀于十法界世間之音名觀世音也。圓教補處者  
從初發心正觀中道了知十界衆生三千性相。如  
鏡中像如水中月。不在內。不在外。不可謂有。不可  
謂無。畢竟非實。而三諦之理。宛然具足。無前無後。  
在一心中。卽一而論三。卽三而論一。觀智既爾。諦  
理亦然。一諦卽三諦。三諦卽一諦。卽于初心。真觀

三諦一切佛法。無緣慈悲於一心中。具修萬行諸  
波羅密。入十信位。已能長別三界苦輪。四住先落  
六根清淨。名爲似解。進入十住初心。卽破無明。開  
發實相。得如來一身無量身。湛然應一切。圓具三  
智。從勝受名。但名一切種智圓具五眼。從勝受名  
但名佛眼。故云開佛知見。初住功德已不可盡。况  
十住十行十向十地。況等覺耶。若能如是解者。名  
爲圓教人法。約無作四諦起無緣慈悲。修不二定  
慧成真。應二身真徧法界藥珠普應一切。橫豎逗

機冥顯兩益。以無缺寶藏金剛般若。拔二種生死微細諸苦。以首楞嚴法界健相。與三點涅槃自在樂。是名不思議一心三智觀于不思議十法界一境三諦之音。名爲觀世音也。問。既觀衆生非有非無。云何行于慈悲答。若不明中道。則不識非權非實。若不識非權非實。則亦無權無實。若無權實。則無四番因果。若明中道。則權實雙照。若雙照權實。則有三種權四諦世出世因果。亦有一實無作四諦世出世因果。宛然具足。在于一念心中。所以

者何。以實相慧覺了諸法非空非有。是名佛寶所覺法性之理。三諦具足。即是法寶。如此覺慧與理事和合。名爲僧寶。事和即有前三教賢聖僧。理和卽有圓教四十二賢聖僧。故大經以月光增減。喻智斷二德。前十五日。喻智光漸增。卽是智德。後十五日。喻邪光漸減。卽是斷德。月體本無偏圓。光相不無盈昃。體無偏圓。以喻實相。光有盈昃。以喻智斷。智光增者。卽諸法不生而般若生。斷光減者。卽諸法不滅而煩惱滅。如是增減。日日有之。如是智

斷地地皆具。若十五日體圓光足。則月不更圓光。不更盛。此喻中道理極。菩提智滿。故云不生不生。名大涅槃。若三十日體盡光滅。究竟無餘。此喻無明已遣。邪倒永除。無惑可斷。故云不滅不滅。名大涅槃。如此明僧寶智斷。皆約中道一實相法。一切因果無所破失也。若不明中道非空非假。但計斷常等。卽破生滅四諦。世出世因果。破三藏教三寶。若但說無常生滅。卽破無生四諦。通教三寶。若但說體法不生不滅真諦。卽破無量四諦。別教三寶。

若但說次第顯于非空非有。亦破圓教無作四諦。一體三寶。傳傳相望。前所破失者多。後所破失者少。若得今圓教意。卽一切無所破失也。問。若圓修實相。則一法三諦。一心三觀。具足諸法。亦應一教四諦。但明圓教。卽足何用四教。如前分別耶。答。若一教圓詮。一切諸法赴利根人。若四教差別。逗鈍根人。苟不假漸次分別。則圓頓何由可解。用別顯圓。所以先明四教。例如欲顯一心三觀。先明次第三觀也。雖說種種道。其實爲一乘。若有衆生不信。

受者當於如來餘深法中示教利喜餘法卽前三  
教旣入佛慧方便自息故云惟此一事實餘二則  
非真故知但一圓頓之教一切種智中道正觀唯  
此爲實觀世音餘皆方便說也本迹者千手眼大  
悲經云此菩薩不可思議威神之力於過去無量  
劫前已作佛竟號正法明如來大悲願力安樂衆  
生現作菩薩又觀音三昧經云先已成佛號正法  
明如來釋迦爲彼佛作苦行弟子悲華經云過去  
寶藏佛時轉輪王第一太子三月供佛及比丘僧

一發菩提心若有衆生受三塗等一切苦惱若能念  
我稱我名字爲我天眼天耳聞見不免苦者我終  
不成無上菩提寶藏佛言汝觀一切衆生欲斷衆  
苦故今字汝爲觀世音大佛頂首楞嚴經云我念  
往昔無量無數恒河沙劫有佛出世名觀世音我  
于彼佛發菩提心彼佛教我從聞思修入三摩地  
初於聞中入流亡所乃至忽然超越世出世間獲  
二殊勝一者上合十方諸佛與佛如來同一慈力  
二者下合十方一切衆生與諸衆生同一悲仰得

成三十二應。十四無畏。四不思議。無作妙德。彼佛歎我善得圓通法門。於大會中授記。我爲觀世音號。由我觀聽十方圓明。故觀音名徧十方界。觀世音得大勢二菩薩受記經云。次阿彌陀後當成正覺。名普光功德山王如來。如此本迹難可測知也。觀心釋者。觀心因緣所生。是三藏觀世音。觀心即空。是通教觀世音。觀心即假。是別教觀世音。觀心即中。是圓教觀世音。又祇此現前一念介爾之心。縱令昏迷倒惑。而能緣之見分。當體無非一心。三

觀。所緣之相分。當體無非一境三諦。雖復當體全  
是妙智妙境。境智不二。而衆生日用不知。枉受輪  
迴。雖復輪迴性德無滅。是理即圓觀世音。若聞而  
能解。不于心外別問佛法及衆生法。是名字即觀  
世音。若如所解而修止觀。圓伏五住。是觀行即觀  
世音。若止觀力強。粗垢先落。淨于六根。是相似即  
觀世音。若發中道真無漏解。開示悟入佛之知見。  
是分證即觀世音。若圓滿菩提歸無所得。三千實  
相。究盡明了。是究竟即觀世音也。次釋普門者。復

1 2 3 4 5 6 7 8 9 80 1 2 3 4 5 6 7 8 9

有二。一通途明門。二約十義解釋。一通途中。復有四意。一略列門名。二示門相。三明權實。四明普不普。一列門名者。如世間門。通至貴賤居室之處。凡鄙以十惡五逆爲門。通至三塗。清昇以五戒十善。四禪四定爲門。通至人天。外道以斷常爲門。通至惑苦。愛以四倒爲門。見以四句爲門。善惡雖殊。求而爲言。俱是有漏世間之門。通至生死也。若就佛法輪門。亦復衆多。三藏四門。通有餘無餘涅槃。通教四門。近通化城。遠通常住。別教四門。漸通常住。

圓教四門。頓通常住。此則四四十六教門。又有十六觀門。合有三十二門。皆是能通之義。其如玄義所明。二示門相者。三藏四門。謂阿毘曇。是有門。成實論是空門。毘勒是亦有亦空門。車匿是非空非有門。一一廣明行法判賢聖位。由門通理也。通教四門。謂如幻之有。如幻之空。亦有亦空。非有非空。亦一一作行相判賢聖位。由門通理也。別教四門。謂觀佛性如閻室瓶盆。卽是有門。觀佛性如空迦毘羅城空。卽是無門。觀佛性如石中金。福人得寶。

罪人見石。是亦有亦無門。觀佛性離二邊節中道。非有非無門。一一作行相判位由門通理也。圓教四門名不異別。但一門卽三門。三門卽一門。不一不四。無歷別之殊。圓融不四之四。一一判不思議。行位之相亦由門通理也。三明權實者藏通二教。若教若觀共十六門能通所通並皆是權。別教教觀八門能通是權所通是實圓教教觀八門能通所通皆實也。四明普不普者。凡夫外道見愛等門尚不能通出三界。何況普耶。藏通二教但通化城。

亦復非普別教漸通亦非普義。唯圓教教觀實相法門能徧十法界千性相三諦。一時圓通圓通中道雙照二諦故稱爲普門也。一通途明門竟。二約十義解釋者至理非數。赴緣利物或作一二之名。或至無量廣略宜然。今且處中略明十義。一慈悲普二弘誓普三修行普四斷惑普五入法門普六神通普七方便普八說法普九供養諸佛普十成就衆生普上通塗普門已約法竟此十普門皆約修行福德莊嚴前五是自行次三是化他後二是

結前兩意。自行中。前四是修因。第五是明果。修因又二。初二是願。三四是行。總生起者。菩薩見一切苦惱衆生。起大慈悲。此心雖不卽是菩提心。能發生菩提心。譬如地水雖非種子。能令芽生。今因大悲起菩提心。亦復如是。次誓願者。若但慈悲。每多退墮。故云魚子菴羅華菩薩初發心。三事因中多及其成就少。以不定故。須起誓願。要期制持此心。令菩提堅固。次修行者。若但發願於他。未益。如無財力。權謀不能拔難。菩薩亦爾。須福德財神通力。

智慧謀乃可化導。故須修行以填願。卽方便道也。次斷惑者。無礙道也。次入法門者。解脫道也。此自行次第也。次神通等者。若欲化他。須示三輪。神通是身輪。方便是意輪。說法是口輪。先以定動。後以慧。拔此化他次第也。次供養諸佛。是結自行。隨順修行。是名真法供養。諸供養中爲最。故大經云。汝隨我語。卽供養佛。稟教而行。是結自行也。成就衆生是結化他。菩薩入諸法門。淨佛國土。皆爲饒益一切衆生故也。解釋者。始從人天。乃至上地。皆有

慈悲此語乃通不出衆生緣法緣無緣若約次第三慈則緣衆生時衆生差別假名不同因果苦樂有異尚不得入法緣慈何得稱普若法緣慈則無人無我無衆生從假以入空尚不得諸假名何況是普若無緣慈者不緣二十五有假名不緣二乘涅槃之法雖無所緣而能雙照空假約此起慈名無緣慈心通三諦稱之爲普也若約一心圓妙三慈則不然且如衆生緣慈悲若觀一法界衆生假名可不名普今觀十法界衆生假名一一法界各

有十法界相性本末究竟等十法界交互卽有百界千如宛然具足在一念心譬如人面備休否相庸人不知相師善識衆生一心具足百界千如性相亦復如是凡夫顛倒理具情迷聖人覺識如彼相師知此千種性相皆是因緣生法若惡因緣生法即是苦相性乃至苦本末旣未解脫故觀此苦而起大悲若善因緣生法卽有樂相性乃至樂本末旣未證得故觀此而起大慈具如玄義廣釋十界相性等也菩薩深觀十法界衆生千種性相具

在一心。遠討根源。照其性德之惡。性德之善。尚自冷然。何況不照修得善惡耶。如見雪山亦有藥王。亦有毒草。以觀性德惡毒惻愴憐憫。起大悲心。欲拔其苦。以觀性德善樂愛念歡喜。起大慈心。欲與其樂。此十法界。收一切衆生。罄無不盡。緣此衆生假名而修慈悲。豈非衆生緣慈悲普耶。問。地獄界重苦未拔。云何與樂。答。衆生入地獄時。多起三念。菩薩乘機。卽與樂因。故言與樂也。又菩薩能大悲代受苦。令其休息。餘九苦輕與樂義可解。次明法

緣慈悲普者。觀十法界性相。一切善惡悉皆虛空。十法界假名。假名皆空。十法界色受想行識。色受想行識皆空。十法界處所。處所皆空。無我。無我所。皆不可得。如幻。如化。無有真實。常寂滅相。終歸於空。衆生云何強計爲實。不覺不知爲苦爲惱。不得無爲寂滅之樂。今欲拔此苦而起大悲。欲與此樂而起大慈。故淨名云。能爲衆生說如此法。卽真實慈也。若緣一法界法起慈悲者。可不名普。今緣十法界法。豈非普耶。三無緣慈悲普者。若緣十法界

性相等差別假名。此假則非假。十法界如幻如化。空則非空。非假故不緣。十法界相性。非空故不緣。十法界之真。既遮此二邊。無住無著。名爲中道。亦無中可緣。畢竟清淨。如是觀時。雖不緣於空假。任運雙照二邊。起無緣慈悲。拔二死苦。與中道樂。如磁石吸鐵。無有教者。自然相應。無緣慈悲。吸三諦機。更無差忒。不須作念也。行者始於凡地。修此慈悲。卽得入五品觀行。無緣慈悲。進入十信相似。無緣慈悲。次入十住。方是分證無緣慈悲。乃至等覺。

鄰極慈悲。普熏衆生。不動而應。如明鏡現像。如磁石吸鐵。三諦具足。故名爲普通。至中道。故稱爲門也。弘誓者。弘名爲廣。誓名爲制。願名要求。制御其心。廣求勝法。故名四弘誓願。弘誓本成慈悲。慈悲旣緣苦樂。弘誓亦約四諦。若見苦諦逼迫。楚毒酸辛。緣此起誓。故言未度令度。若見集諦顛倒迷惑。繫縛。緣此起誓。故言未解令解。行清淨道能出生死。至安樂地。衆生不識。欲示衆生立於此道。故言未安令安。煩惱滅處。子果縛斷。名爲涅槃。衆生未

證。緣此起誓故言未得涅槃令得涅槃。生死因難識苦果易知故先果後因。涅槃理妙須方便善故先因後果如此四諦不出一心迷心起業業卽因果欲識果源泉但由集制心息業則生死輪壞煩惱調伏名之爲道修行不懈則苦忍明發子果俱斷名之爲滅雖有四別終是一念更非異法四諦旣爾弘誓亦然但凡夫厭下攀上約此立誓未達四諦是不名普藏通二教惟見分段四諦亦不名普別教先約分段次約變易此亦非普圓教菩薩

一於一心中徧知一切苦集滅道徧知集者凡夫見愛卽有作之集二乘著空卽無作之集故淨名云法名無染若染於法是名染法非求法也又云結習未盡華則著身卽是變易之惑全未除也大經云汝諸比丘於此大乘未爲正法除諸結使卽無作集也乃至順道法愛生亦是無作集也徧知苦者以有集故卽能招苦有作集招分段苦無作集招變易苦故界內道諦卽是界外集諦界內滅諦卽是界外苦諦也徧知對治苦集之道滅者人天

五戒十善四禪四定。不動不出。藏通四諦十二因緣。通至有餘無餘二種涅槃。別教歷別通至常住。不能于一道有無量道。不名普道圓教中道。即是實相。普賢觀云。大乘因者諸法實相。修如此道。名爲圓因。故稱普道。所得涅槃。即是究竟常住。一切煩惱永無遺餘。譬如劫火。無有遺燼。普賢觀云。大乘果者諸法實相。證如此滅。名爲圓果。故稱普滅。所觀四諦既周。緣諦起誓。何得不偏。故云弘誓普一也。修行者次第五行非普。一心五行。乃名爲普。具

如玄義行妙中說斷惑者。若從般入空。止斷四住。華猶著身。未爲正法。除諸結使。但離虛妄。未得一切解脫。故不名普。若從空入假。止除塵沙。不依根本而斷。亦不名普。若空假不二。正觀中道。根本既傾枝條自去。如覆大地。草木悉碎。故名斷惑普也。入法門者。若二乘入一法門。不能入二。何況衆多。若修歷別之行。階差淺深。亦不名普。若入王三昧。一切三昧悉入其中。譬如王來。必有營從。營從復有營從。王三昧亦如是。一諦三昧。卽三諦三昧。三

諦三昧復各有無量法門而爲眷屬亦皆悉入王三昧中故名入法門普也神通者羅漢見大千初地見百界二地見千界等皆是限量之通故不名普何以故緣境既狹發通亦小今圓教菩薩偏緣十法界境發通徧見十法界而無限極三乘尚不知其名何況見其境界眼見旣爾餘例可知方便者有進行方便是道前自行方便有起用方便是道後化他方便今正明道後方便也若二乘及權位菩薩自行方便止能入一法門故起用化他但

能齊其所得道前道後俱非是普今圓教菩薩以二諦爲方便收得一切方便入中道已雙照二諦二諦神變徧十法界而於中道無所損減道前道後皆名爲普也說法者二乘及權位菩薩不能一時徧答衆聲又殊方異俗不能令其俱解今圓教人一時演法隨類得解以一妙音徧滿十方如修羅琴隨人意出聲故名說法普也供養諸佛者有一一事二理事供養者如華嚴云不爲但供養一佛故乃至不爲但供養不可說佛刹微塵數佛故

爲欲偏供養盡法界虛空界一切諸佛故不起滅定。現諸威儀安禪合掌讚諸法王以身命財一切供具周至十方如普賢願王所說也。理供養者圓智正觀之心名之爲覺覺即是佛。萬行功德熏修此智卽供養佛也。故云供養諸佛普也。成就衆生者譬如螢火燈燭星月爲益蓋微若日光照世則一切卉木叢林福令生長華果成就外道如螢二乘如燈燭小菩薩如星別教如月今圓教菩薩猶如日輪又如大雲一時等澍四方俱下三草二木

各得生長故云成就衆生普也。普門之義何可窮盡略舉十義以示其端耳。但觀現前一念心性法爾具足三千性相卽空卽假卽中正是無作四諦妙境緣此妙境而起慈悲慈悲則普立弘誓願弘誓則普依此修行一行一切行故修行普依此斷惑一斷一切斷故斷惑普依此入法門一法門一切法門故入法門普依此而起神通卽是無記化化故神通普依此而起方便偏逗十界權實頓漸種種機緣故方便普依此說法一音鶯報衆聲故

說法普。依此供養諸佛三世諸佛悉受其供。故供養普。依此成就衆生法界羣機皆得四益。故成就普。一切衆生心性無減是理。卽普門。聞而生解。是名字。卽普門。圓伏五住。是觀行。卽普門。清淨六根。是相似。卽普門。開示悟入。是分證。卽普門。法界洞徹。窮源盡性。是究竟。卽普門也。釋品名竟。此品因曇摩羅識法師教河西王沮渠蒙遜誦之除病。所以流通別行。良由觀音大士與此方尤有緣故。智者大師亦別說玄義及義疏各有二卷。玄義亦作

五重。謂人法等爲名。已如前說。靈智合法身爲體。感應爲宗。慈悲利物爲用。流通醍醐味爲教相也。妙法蓮華經台宗會義卷七之一。

妙法蓮華經台宗會義卷七之二

唐僧慧能註古吳後學溝益智旭述

普門品入文爲二。初問答。二聞品功德。

(戊) 初中二。初長文。二偈頌。

(己) 長文有兩番問答。

(庚) 初番爲二。初問。二答。

(辛) 今初

爾時無盡意菩薩卽從座起偏袒右肩合掌向佛而作是言。世尊觀世音菩薩以何因緣名觀世音。

爾時者說東方菩薩竟次應說西方菩薩時也。世說東方生善竟次應說西方生善時人說東方斷

疑竟次應說西方斷疑時對治說東方得道竟次應

說西方得道時第一無盡者境也。大品明空則無

盡。真義大集明八十無盡門。華嚴明十種不可盡。俗中

淨名云。夫無盡者非盡非無盡故名無盡。中意者

智也。卽一心三智也。智契於境境隨智空名無盡

意。亦又意者世出世之本也。智隨于境境多智多

名無盡意。假又意卽法界。一切皆是法界。故言能

觀心性。名爲上定中而作是言者。具二莊嚴故能

問也。以何因緣者。若就衆生則以善惡兩機爲因

聖人靈智慈悲爲緣。若就菩薩則以觀智慈悲爲  
因。衆生機感爲緣也。

辛二答三。初總答。二別答。三勸持名答。卽大佛頂

經所明十四無畏也。壬今初

佛告無盡意菩薩。善男子。若有無量百千萬億衆生受諸苦惱。聞是觀世音菩薩。一心稱名。觀世音菩薩卽時觀其音聲。皆得解脫。

無量百千萬億衆生。標十法界種種機也。受諸苦惱。明別業所感果報各不同也。自有一人受一苦。

法華會事一六

一人受多苦。多人受一苦。多人受多苦。今顯人多苦多。並爲菩薩與拔之境也。遭苦由于二世之惡。聞名卽是二世之善。一心稱名。有事有理。如此善惡各爲機感也。卽時觀其音聲者應之速也。皆得解脫者應之普也。聞有四義。謂聞聞聞不聞。不聞聞。不聞不聞。隨達一種。卽是四教聞慧。一心稱名。卽四教思修二慧。事一心者。謂念念相續。不起雜想。理一心者。謂了知此心非自他。共亦非無因能稱所稱。體是法界也。事一心解脫事難理一心解

脫理難。隨感必應。如啐啄同時。若夫稱唱累年。不蒙寸效者。祇由未臻事一心故。然亦能作未來得度因緣。故雖散心一稱名號。功無虛棄。但效有遲速耳。

(壬)二別答三初約口業機明應。二約意業機明應。三約身業機明應。  
癸初中二。初明七難。二結歎。子初又七。初火難。至七怨賊難。  
壬今初若有持是觀世音菩薩名者。設入大火。火不能燒。由是菩薩威神力故。

法華會義十六

持名是善入火是惡。善惡合爲機感。威神力故。火不能燒。卽是應也。果報火下從地獄上至初禪。皆論機應。惡業火下從地獄上至非想。皆論機應。煩惱火下從地獄上至等覺。皆論機應也。

(丑)二水難

若爲大水所漂。稱其名號。卽得淺處。

水漂是惡。稱名是善。以此爲機。得淺是應也。果報水下從地獄上至二禪。惡業水通三界。煩惱水通九界。並論機感。

(未)三羅刹難

若有百千萬億衆生爲求金銀瑠璃碑磲碼瑙珊瑚琥珀真珠等寶。入於大海。假使黑風吹其船舫。墮羅刹鬼國。其中若有乃至一人稱觀世音菩薩名者。是諸人等。皆得解脫羅刹之難。以是因緣名觀世音。此羅刹難亦是風難。果報羅刹在欲界惡業羅刹徧三界煩惱羅刹通九界。又果報風至三禪惡業風徧三界煩惱風通九界。各論機應。並可例解。

(未)四刀杖難

法華會義十六

若復有人臨當被害稱觀世音菩薩名者彼所執刀杖尋段段壞而得解脫

果報刀杖局在地居惡業刀杖遍三界煩惱刀杖通九界也

(五)五鬼難

若三千大千國土滿中夜叉羅刹欲來惱人聞其稱觀世音菩薩名者是諸惡鬼尚不能以惡眼視之况復加害

鬼難例前羅刹可解言大千滿中者假使之辭意

顯煩惱惡鬼彌滿唯稱名能降伏之

(五)六枷鎖難

設復有人若有罪若無罪杻械枷鎖檢繫其身稱觀世音菩薩名者皆悉斷壞卽得解脫

有罪是現世惡無罪是過去惡在手曰杻在足曰械在頭曰枷連身曰鎖封名爲檢縛名爲繫果報枷鎖在欲界惡業枷鎖遍三界煩惱枷鎖通九界也

(五)七怨賊難

若三千大千國土。滿中冤賊。有一商主。將諸商人。齋持重寶。經過險路。其中一人作是唱言。諸善男子。勿得恐怖。汝等應當一心稱觀世音菩薩名號。是菩薩能以無畏施於衆生。汝等若稱名者。於此怨賊當得解脫。衆商人聞。俱發聲言。南無觀世音菩薩。稱其名故。即得解脫。

大千滿中。亦假設之解。奪命名冤劫財名賊果報冤賊。在欲界惡業冤賊遍三界煩惱冤賊通九界觀心釋者。大千滿中冤賊無始煩惱種子集在第

八藏識中也。有一商主第六識也。諸商人。徧行別境。及諸善心所也。重寶出世三乘法也。經過險路。諸對治法與諸煩惱相遇也。其中一人或是勝解或是善慧。或是信也。一心稱名。四教聞思修慧也。俱發聲者。心王與諸善心所決相應也。即得解脫者。證于四教所詮理也。又此七難。即表衆生身有六火。火即火大。水即水大。風即風大。刀杖枷鎖皆卽地大。三千大千以表空大。羅刹冤賊以表識大。觀音菩薩觀此六火。皆如來藏。一一卽空假中。自

## 法華會第十六

既解脫故能令他解脫。衆生迷此六大之性。枉受  
果報惡業煩惱諸難。然正迷時性德無改。原與菩  
薩體同。故聞名稱念隨其解有偏圓行有淺深。所  
得四教四益亦有差別。究竟終得一切種智。則無  
別也。初明七難竟。

## (子)二結歎

無盡意觀世音菩薩摩訶薩威神之力。巍巍如是。  
巍巍者高顯也。功超九界。故高名彰三土。故顯初  
約口業機明應竟。

## (卷)二約口業機明應二。初明三毒二結歎

初

若有衆生多於婬欲。常念恭敬觀世音菩薩。便得離  
欲。若多瞋恚。常念恭敬觀世音菩薩。便得離瞋。若多  
愚癡。常念恭敬觀世音菩薩。便得離癡。

多欲恚癡是惡。常念恭敬是善。此二爲機。得離即  
是應也。事欲事恚局在欲界。事癡卽通三界。理三  
毒者。二乘以耽真爲欲。異俗爲瞋。不了生死涅槃  
如幻爲癡。出假菩薩以遊戲神通爲欲。訶厭二乘

爲瞋。不達中道爲癡。地前菩薩以中道似愛爲欲。雙捨二邊爲瞋。無明未破爲癡。乃至等覺後心猶有微細無明未破。卽有微細欲恚未除。今由大悲菩薩從初發心。觀此貪瞋癡等煩惱皆是因緣生法。一一卽空假中。卽空故離凡夫三毒。卽假故離二乘三毒。卽中故離菩薩三毒。成就不可思議三種善根。亦是成就不可思議大貪大瞋大癡法門。故令常念恭敬之者。隨解偏圓。隨行淺深得離亦有種種差別。究竟歸于無差別也。

(子)二結歎  
無盡意。觀世音菩薩有如是等大威神力。多所饒益。是故衆生常應心念。

二約意業機明應竟

(癸)三約身業機明應二。初明二求。二結歎  
(子)今

若有女人。設欲求男禮拜供養觀世音菩薩便生福德智慧之男。設欲求女。便生端正有相之女。宿植德本。衆人愛敬。

求男求女獨標女人者。女人以無子爲苦。夫主所棄。並婦所輕。旁人所笑故也。禮拜供養是機感。便生男女是普應也。法門解者。四教未證實理。皆名女人。四教各論慧男定女。良由大士先證權實男女。故能爲增上緣。令諸行人各得成就諸定慧也。又欲界有慧無定是狂男。無色有定無慧是癡女。四禪定慧均平。如福德男端正女也。然男無破惑之功。女無出生無漏之力。此亦無用男女。藏通兩教二乘慧能斷見思惑。是幹事之男。定能發生無

漏。是育嗣之女。然慧不能破無明見佛性。則男而不男。定不能懷中道子。則女猶石女。故大經云。二乘定多慧少。不見佛性。菩薩慧多定少。亦不見佛性也。唯別教初地真明慧發無緣慈成乃名真正。男女圓教初住見中道時定慧具足。男女相滿。故男名福德是有定之慧。女名端正。是有慧之定也。

(子)二結歎

無盡意觀世音菩薩有如是力。若有衆生恭敬禮拜。觀世音菩薩福不唐捐。

唐指謂虛棄此句兼釋疑也。亦有禮拜不得男女者。唯由機淺故所求未遂而禮拜之福終必不失也。二別答竟。

⑤三勸持名答三。初勸持二格量三結歎。今

初

是故衆生皆應受持觀世音菩薩名號。

上說觀音得名因緣其力廣大既不辨形質但是述名論德若欲歸崇宜受持名號故結勸持名也良由萬德洪名稱實所召只此一名一字法爾具

足三千性相三諦妙理。法爾圓收頓漸偏圓權實妙智。法爾理智本自不二。不二而二。理智宛然舉一假名則一切假名。一切實法。一切國土無不歸趣此假名中。是故聞名功德已自不可思議受持功德尤不可思議也。持名既爾想彼正報依報亦復如是。故知阿彌陀經觀無量經與此妙經同一圓頓甚深希有法門無有優劣。

二格量

無盡意若有人受持六十三億恒河沙菩薩名字復

盡形供養飲食衣服卧具醫藥。於汝意云何。是善男子善女人功德多不。無盡意言甚多。世尊佛言。若復有人受持觀世音菩薩名號乃至一時禮拜供養。是二人福正等無異。於百千萬億劫不可窮盡。

文有四意。一格量本。二問。三答。四正格量也。格量本中。共舉四多。六十二億恒沙。是福田多。受持是持名多。盡形是時節多。飲食等四事供養是種子多。以此四多爲格量本也。問答可知。正格量中。還舉四少以格四多。但一觀世音。則福田少。持名亦

少。乃至一時則時少。禮拜供養不言四事。則種子少。而功德正等無異。良由真如實際。一多無性。本自平等故也。觀音證此實際。一則非一。與多正等。六十二億證此實際。故多則非多。與一正等。一中解無量。故說六十二億無量中解一。故說觀世音耳。占察經云。能聞我名者。卽爲聞十方佛名。亦是此意。

卷三結歎

德之利

法華會第十六

十一

初番問答明衆生三業顯機爲境。法身靈智冥應。境智因緣名觀世音竟。

(庚)次番亦二。初問。二答。

辛今初

無盡意菩薩白佛言。世尊觀世音菩薩云何遊此娑婆世界。云何而爲衆生說法方便之力。其事云何。問有三意。一云何遊是問身業。二云何說是問口業。三方便云何是問意業。卽是三輪不思議化。亦名三不護。三無失也。不思議化者。化作佛身。亦卽

化作佛口佛心。乃至化作執金剛神。亦卽化作金剛心口。雖屈曲利物。而于法身智慧無所損減。故淨名云。善能分別諸法。相於第一義。而不動。不動而動。名不思議化也。問意業云何可化。答聖意無能測者。若欲示之。乃至昆蟲亦令得知。故唯識云。無上覺者。神力難思。化無量類。皆令有心。也不護者。住不思議圓普法門。實不作意計校籌量。次第經營。譬如明鏡隨對卽現。無有分別。亦無前後也。無失者。衆生根機不同。淺深有異。觀音雖不作念。

逗機而逗機無失契當前人冥會事理也

(辛)二答三初別答二總答三勸供養

(壬)今初

佛告無盡意菩薩善男子若有國土衆生應以佛身得度者觀世音菩薩卽現佛身而爲說法應以辟支佛身得度者卽現辟支佛身而爲說法應以聲聞身得度者卽現聲聞身而爲說法應以梵王身得度者卽現梵王身而爲說法應以帝釋身得度者卽現帝釋身而爲說法應以自在天身得度者卽現自在天身而爲說法應以大自在天身得度者卽現大自在

天身而爲說法應以天大將軍身得度者卽現天大將軍身而爲說法應以毘沙門身得度者卽現毘沙門身而爲說法應以小王身得度者卽現小王身而爲說法應以長者身得度者卽現長者身而爲說法應以居士身得度者卽現居士身而爲說法應以宰官身得度者卽現宰官身而爲說法應以婆羅門身得度者卽現婆羅門身而爲說法應以比丘比丘尼優婆塞優婆夷身而爲說法應以長者居士宰官婆羅門婦

女身得度者卽現婦女身而爲說法。應以童男童女身得度者卽現童男童女身而爲說法。應以天龍夜叉乾闥婆阿修羅迦樓羅緊那羅摩睺羅伽人非人等身得度者卽皆現之而爲說法。應以執金剛神得度者卽現執金剛神而爲說法。

應以之言答意業方便能知機宜。現身答身業。說法答口業。三業本不相離也。此中別明三十三身。若凡人及非人。則是三十五身。大佛頂經明三十二應。開出獨覺別爲一。合四婦女但爲一略不言。

迦樓羅文有開合義無增減。總而言之。正是十法界身耳。不言菩薩身者。正就菩薩法界廣明現餘九法界像。以顯十界互具重重無盡之意也。不言地獄界者。攝在非人中也。若有國土衆生者。實報方便同居三種國土十法界機也。實報土中。純以菩薩而爲衆生。唯有一佛界機。方便土中。有九種衆生。謂藏教二乘無學通教三乘斷通惑人。別三十三心圓教十信。也有二種機。一是佛界機。二是菩薩界機也。同居土中。具足九界衆生及十界機。對

機設應具須十界佛身。又有四教相別。辟支又有  
一緣獨不同。聲聞又有析法體法。四向四果及示隨  
五味展轉調伏不同。既現梵王理應亦現光音偏  
淨二王。既現帝釋理應亦現夜摩兜率化樂三王。  
自在卽欲界主。大自在卽四禪主。既云毘沙門亦  
必現餘三天。故佛頂直云四天王也。既云小王亦  
必應現四種輪王。既云人非人等。言人則老少貴  
賤何所不收。言非人則地獄鬼畜何所不收。故下  
文云。以種種形遊諸國土。但可意知。豈可言盡。爲

說法者隨其所堪。或權或實。或頓或漸。或顯或密。  
令得權實四益。究竟終歸一實益耳。

壬二總答

無盡意是觀世音菩薩成就如是功德。以種種形遊  
諸國土度脫衆生。

前別答三十五身文廣而意狹。此總答如是功德  
文狹而義廣。以種種形。則不止三十五身。遊諸國  
土。則不局娑婆世界明矣。

壬三勸供養二初勸。二受旨

癸今初

是故汝等應當一心供養觀世音菩薩。是觀世音菩薩摩訶薩於怖畏急難之中能施無畏。是故此娑婆世界皆號之爲施無畏者。

既名觀世音亦名施無畏者。從德受名。德既無盡。名亦無盡也。

(癸)二受旨六初奉命二不受三重奉四佛勸五受

已轉奉六歎結

(子)今初

無盡意菩薩白佛言世尊我今當供養觀世音菩薩卽解頸衆寶珠瓔珞價直百千兩金而以與之作是

言仁者受此法施珍寶瓔珞

普陀外華嚴經卷第十一

衆寶珠瓔珞者衆寶間珠共爲嚴飾也。無盡意位高瓔珞何止直百千兩如云百姓萬民不止一百一萬也。又頸表中道一實之理以衆多無盡法門莊嚴實相如瓔珞在頸解者表菩薩爲常捨行故一切願行功德乃至佛智菩提涅槃亦不住不著無依無倚故言解也。大集云戒定慧陀羅尼以爲瓔珞莊嚴法身百重是十萬表十地各有萬德也法施者財卽是法財是因緣生法卽空卽假卽中

三諦一心。一切具足於法平等於財亦等。如此施者卽是法施也。

子二不受

時觀世音菩薩不肯受之。約事則無盡意奉命供養我未奉命故不肯受禮應遜讓也。約表法則不受三昧廣大之用故無所受。

子三重奉

無盡意復白觀世音菩薩言仁者愍我等故受此瓔珞

珞

或請上愍下或地位相齊亦可相愍或我爲四衆故施仁愍四衆而受以無所受而受諸受也。

子四佛勸

爾時佛告觀世音菩薩當愍此無盡意菩薩及四衆天龍夜叉乾闥婆阿修羅迦樓羅緊那羅摩睺羅伽人非人等故受是瓔珞

正以菩薩爲物故施亦應爲物故受也

子五受已轉奉

卽時觀世音菩薩愍諸四衆及於天龍夜叉乾闥婆阿修羅迦樓羅緊那羅摩睺羅伽人非人等受其瓔珞分作二分一分奉釋迦牟尼佛一分奉多寶佛塔祇一法施瓔珞分作二分表一實相舉體作事理二因也奉二佛者表以二因趣二果也理圓卽法佛事圓卽報佛還以二佛表二果也

子六歎結  
無盡意觀世音菩薩有如是自在神力遊於娑婆世界

### 初長文竟

○已二偈頌什公不譯故舊本皆無文句義疏亦皆不釋續高僧傳云偈是開那掘多所譯今流通本既並增入故科註中依慈雲師所分之科而消釋之大科爲三初雙頌兩問二雙頌兩答三

雙頌兩勸

(庚)今初

爾時無盡意菩薩以偈問曰

世尊妙相具我今重問彼佛子何因緣名爲觀世音

初句歎佛德次句雙含二問後二句別頌初問也

(庚)二雙頌兩答二初加頌總歎行願二別頌兩答

(辛)今初

具足妙相尊偈答無盡意汝聽觀音行善應諸方所弘誓深如海歷劫不思議侍多千億佛發大清淨願初二句經家敘辭次六句佛正答也汝聽者誠令生三慧也觀音行者一心三智觀十界音令無量苦一時解脫卽已成利他行也善應諸方所者不動真心垂形三土三十二應處處現往卽普門神通力也此二句總歎所赴真應二身也弘誓深如

海者明其初發心時緣於無作四諦故橫該十界豎徹三諦廣且深也歷劫等者明其中間以行填願所經時久所侍佛多所發願大故得成今真應二身譬如水漲船高泥多佛大也

(辛)二別頌兩答二初頌前答二頌後答 (壬)初中

二初頌總答二頌別答

(癸)今初

我爲汝略說聞名及見身心念不空過能滅諸有苦略說者舉要而言也聞名故稱口業機也見身故禮身業機也心念意業機也諸有二十五有也

(卷)二頌別答二初頌七難。二頌三毒二求。(子)初

中十二初頌第一火難至十二加頌雷雨難

(丑)今初

假使典害意推落大火坑。念彼觀音力。火坑變成池  
念彼觀音者。若就佛說。觀音爲彼。卽約師弟假分  
彼此。若就衆生念彼觀音。卽約感應暫分彼此。師  
弟感應無非法界。能所宛然能所斯絕。衆生念自  
心中之彼觀音。觀音應自心中之彼衆生。感應道  
交。不可思議。

(丑)二頌第二水難

或漂流巨海龍魚諸鬼難。念彼觀音力。波浪不能沒  
(丑)三加頌墮須彌難

或在須彌峰爲人所推墮。念彼觀音力如日虛空住  
約事。卽是假設之辭。設使從須彌墮尚不損傷况  
餘山耶。約觀解者。本在中道實相性德須彌山王。  
無明惡人推墮二死海中。念彼觀音三智三德。便  
同諸佛住無所住。

(丑)四加頌墮金剛山難。例須彌難可解

1 2 3 4 5 6 7 8 9

或被惡人逐墮落金剛山。念彼觀音力不能損一毛。

(丑)五超頌第七冤賊難。

或值冤賊繞各執刀加害。念彼觀音力。咸卽起慈心。

(丑)六追頌第四刀杖難。

或遭王難苦臨刑欲壽終。念彼觀音力。刀尋段段壞。

(丑)七追頌第六枷鎖難。

或囚禁枷鎖手足被杻械。念彼觀音力。釋然得解脫。

(丑)八加頌呪咀毒藥難。

呪詛諸毒藥所欲害身者。念彼觀音力還著於本人。

呪使鬼神往殺前人。若前人有種種福德所護不可殺者。法須還著本人。密部明之甚詳。須知還著本人。亦復具有四悉檀益。蘇軾改云。兩家俱沒事者。見識單淺。未知折攝之妙也。

(丑)九追頌第五鬼難。

或遇惡羅刹毒龍諸鬼等。念彼觀音力。時悉不敢害。

(丑)十加頌惡獸難。

若惡獸圍繞。利牙爪可怖。念彼觀音力。疾走無邊方。

(丑)十一加頌蛇蠍難。

蛇及蝮蠍。氣毒煙火然。念彼觀音力。尋聲自廻去。  
 ⑤十二加頌雷雨難。雲雷鼓掣電降雹澍大雨。念彼觀音力。應時得消散。  
 正頌七難。加頌有五。共爲十二。皆須具約果報惡業煩惱六道四教一一釋之。若約所表。不出六大須彌金剛。亦是地大。雷電火大。雹雨水大。獸蛇呪詛。皆表識大。菩薩因中觀此六天。都空假中。今住六種如實之際。故徧法界救諸苦惱。以要言之。一切依正。皆是觀音妙色妙心。一切衆生。于聖色心。

而自爲難。如闇中觸寶自傷其身。三業求救。亦卽觀音。是故機成。卽時而應。當以此義。念念觀之。何患不同觀音利物。初頌七難竟。

⑥二頌三毒二求

衆生被困厄。無量苦逼身。觀音妙智力。能救世間苦。界內界外。皆有三毒之苦。皆有無男無女之苦。故無量也。初頌前答竟。

⑦二頌後答二。初正頌示現。二加頌顯機顯應

⑧初正頌示現。長文有別有總。別明三十二應。

總明身多境多。今不分總別。但通明三輪不思議化。卽分爲三。初明身業普應。二明意業普觀。

三明口業普說。子今初

具足神通力。廣修智方便。十方諸國土。無刹不現身。種種諸惡趣地獄鬼畜生。生老病死苦。以漸悉令滅。具足神通力者。百界千如全體之妙用也。廣修智方便者。權實二智照性以發通也。上文但以非人二字含三惡趣。今具出之。故知其十法界身也。分段變易各有四相之苦。以漸悉令滅歸于常寂光。

或權或實。循循善誘。合宜而用。藥不執方明矣。

子二明意業普觀

真觀清淨觀。廣大智慧觀。悲觀及慈觀。常願常瞻仰。無垢清淨光。慧日破諸暗。能伏災風火。普明照世間。初一偈明所證體。次一偈明所起用也。真觀者。證不思議空也。清淨觀者。證不思議假也。廣大智慧觀者。證不思議中也。悲觀者。以不思議三觀與佛如衆生同一悲仰也。慈觀者。以不思議三觀與佛如來同一慈力也。同慈力故云常願。同悲仰故常瞻。

仰。由深證此一心三觀故發無垢清淨光明。名爲慧日。能破十界三惑闇之集諦。能伏十界二死災風火之苦諦。能與十界道滅而普明照世間也。

子三明口業普說

悲體戒雷震慈意妙大雲。澍甘露法雨滅除煩惱。欲說大法必依身意以爲授法之本爲度衆生。現身說法。故所現身名爲大慈悲體。與下慈意互舉一字。相影略耳。先用戒德警人。如天震雷物無不肅。故云悲體戒雷震也。拔苦與樂名爲大慈悲意。

無緣而被名之爲妙。物無不覆譬如大雲。故云慈意妙大雲也。諸天甘露服之不死。所澍法雨亦復如是。聞者悟道證常住命。三惑煩惱苦餒滅除。與拔同時。十界皆得度也。初正頌示現竟。

癸二加頌顯機顯應

諍訟經官處怖畏軍陣中。念彼觀音力。衆冤悉退散。長文三十二應。應雖屬顯機則或冥或顯不可定判。今頌旣云念彼觀音則灼然。是顯機也。諍訟怖畏亦須果報惡業煩惱三釋。或此亦是加頌七難。

偶錯簡耳。但云衆冤退散或仍是冥應也。二雙頌雨答竟。

(庚)三雙頌兩勸二。初頌前番勸持名。二頌後番勸供養。(辛)初中二。初明境智深妙以勸常念。二

明感應難測以勸勿疑。(壬)今初

妙音觀世音。梵音海潮音。勝彼世間音。是故須常念此明菩薩有種種德。具種種名。一一名字。並詮法界圓融。不思議德。故須念也。卽權而實名爲妙音。卽實而權名觀世音。契本淨性。名爲梵音。契十界名號功德正等。

(壬)二明感應難測以勸勿疑。  
機名海潮音。權實不二。自他不二。故勝彼十法界當世間音也。權卽實故。他卽自故。勝于別教所詮九界迷理起惑。實卽權故。自卽他故。勝于別教所詮佛界緣理斷九也。所以觀音一名。卽與六十二億名號功德正等。

(壬)二明感應難測以勸勿疑。

念念勿生疑。觀世音淨聖於苦惱死厄。能爲作依怙。真疑去則念成念成。則二死可脫。故勸勿疑。初頌前番勸持名竟。

(辛)二頌後番勸供養。

法華會第十六

二五

具一切功德慈眼視衆生福聚海無量是故應頂禮頂禮即是三業供養也初問答竟

(戊)二聞品功德二初持地歎證二經家述益 己

今初

爾時持地菩薩卽從座起前白佛言世尊若有衆生聞是觀世音菩薩品自在之業普門示現神通力者當知是人功德不少

自在之業謂于七難三毒二求皆得大自在也普

門示現謂現十法界身方便說法也聞者功德已自不少况受持讀誦解說書寫如說修行者乎然非通別釋題安令聞者獲大功德故須持地菩薩而歎證之大佛頂經云毘舍浮佛摩頂謂我當平心地則世界地一切皆平我卽心開見身微塵與造世界所有微塵等無差別悟無生忍聞諸如來宣妙蓮華佛知見地我先證明而爲上首蓋既悟地夫本如來藏卽悟七大皆如來藏既悟七大皆如來藏卽悟五陰六入十二處十八界皆如來藏

既悟陰入處界皆如來藏。既悟七難三毒乃至十法界身皆如來藏。故能證此聞品功德也。

(巳)二經家述益

佛說是普門品時衆中八萬四千衆生皆發無等等阿耨多羅三藐三菩提心。無等者無上菩提。無與等者得此理已等一切法皆成無上。如世仙丹。無與等者能點他物亦成仙丹。此約開顯之圓。橫收一切皆歸一實也。又究竟佛果。無與等者初發心時即便等之。如轉輪王。

無與等者太子初生即便等之。此約實相之體。豎談因果。初後宛然也。又心即理。理即心。心外無理。理外無心。心之與理。但有名字。名字性空。俱不可說。將何物等何物。而云無等等耶。不可說而說。說此心等此理。是故言無等等。此約雙遮雙照。非橫非豎。而橫而豎也。發心有三。一觀行發心。二相似發心。三分證發心。今必是分證也。約化他勸流通。

中二勗受法弟子竟

釋普門品竟次釋陀羅尼品

陀羅尼品第二十六

法華會義一十六

二十一

陀羅尼此翻總持持惡不起持善不失。世又翻遮持能持善爲人能遮惡對治遮邊惡持中善第一衆經用法不同或專治病如療痔等或專護法如此文或專滅罪如方等或通用治病滅罪護經如請觀音等或大神呪大明呪無上呪無等等呪則非治病非滅罪非護經又密部共有三種一佛部自分五部卽五佛所說也一菩薩部三鬼神部一一部中各論上中下三法成就增益名上法禳災攝召

名中法降伏名下法于上法中又分三品各有行儀各有觀法各有嚴禁而通以無上菩提心爲主意若無師傳則名盜法若違行儀則招惡報若犯嚴禁輒以功效向他人說則招奇禍並是如來不可思議四悉益物切須依經幸勿乖教舊名爲呪新譯名爲真言亦名爲明或是鬼神王名故能降伏鬼神世界或如軍中密號唱使相應爲人或如密默治惡對治或是如來密語如王索先陀婆羣下不曉唯有智臣乃能知之洗時奉水飲時奉器食時奉鹽

遊時奉馬陀羅尼亦爾祇是一法徧有諸力病愈  
罪除善生道合第一故存本音不翻譯也

丙三呪護者惡世弘經每多惱難故以真言護之使道流通也文爲四初問持經功德二答甚多三請以呪護四聞品得益丁今初爾時藥王菩薩卽從座起偏袒右肩合掌向佛而白佛言世尊若善男子善女人有能受持法華經者若讀誦通利若書寫經卷得幾所福

丁二答甚多

佛告藥王若有善男子善女人供養八百萬億那由他恒河沙等諸佛於汝意云何其所得福寧爲多不甚多世尊佛言若善男子善女人能於是經乃至受持一四句偈讀誦解義如說修行功德甚多

丁三請以呪護五初藥王二勇施三毘沙門四持國五羅刹女戊初中四初請二說三歎四印

己今初

爾時藥王菩薩白佛言世尊我今當與說法者陀羅尼呪以守護之

呪是華言。謂禁呪。呪祝。呪願也。秘密不翻。乃以此名目之。今華梵雙舉。故云陀羅尼呪。

(巳)二說

卽說呪曰。安爾一曼爾二摩禰三摩摩禰四首隸五遮梨第六賒咩莫者七賒履多瑋八羶帝九日帝十目多履十姿履十一阿瑋姿履十三桑履十四婆履十五叉裔六阿叉裔十七阿耆膩蘇奈八羶帝十賒履十二陀羅尼二十一阿盧伽婆娑蘇奈簸蕉毗叉膩二十二禰毗剃二十阿便嚩遷禰履剃二十四阿亶多罕二十二禰波隸輸地二十歐究

隸二十牟究隸二十阿羅隸二十波羅隸二十首迦差初几切三十阿三磨三履三十佛陀毗吉利奏音姓帝十三二達磨波利差猜離帝三十僧伽涅瞿沙禰三十婆舍婆舍輸地三十曼嚩遷三十曼嚩遷叉夜多三十郵樓嚩八十郵樓嚩憍舍略來加切三十九惡叉遷十惡叉治多冶四十阿婆盧四十阿摩若莊蓮那多夜四十  
(巳)三歎

世尊。是陀羅尼神呪。六十二億恒河沙等諸佛所說。若有侵毀此法師者。則爲侵毀是諸佛已。

(巳) 四印

時釋迦牟尼佛讚藥王菩薩言。善哉善哉。藥王。汝愍念擁護此法師故。說是陀羅尼。於諸衆生多所饒益。

(戊) 二勇施三初請二說三歎 (巳) 今初

爾時勇施菩薩白佛言。世尊。我亦爲擁護讀誦受持法華經者說陀羅尼。若此法師得是陀羅尼。若夜叉。若羅刹。若富單那。若吉蔗。若鳩槃荼。若餓鬼等。伺求其短。無能得便。

富單那熱病鬼也。吉蔗起尸鬼也。

(巳) 二說

卽於佛前而說。呪曰。座

誓螺

隸

一摩訶連隸

二郁枳

音紙

目枳

四

阿隸

五

阿羅婆第

六

涅隸第

七

涅隸多

婆第

八

伊紱

者利

柅

女紙

韋紱柅

十

旨紱柅

十一

涅隸

十二

涅犁

墀柅

十三

婆底

十四

世尊。是陀羅尼神呪。恒河沙等諸佛所說。亦皆隨喜。若有侵毀此法師者。則爲侵毀是諸佛已。

(戊) 三毘沙門三初請三說三歎 (巳) 今初

法華會第十六

爾時毗沙門天王護世者。白佛言。世尊。我亦爲愍念衆生擁護此法師故說是陀羅尼。

(已)二說

卽說呪曰。阿梨一那梨二菟那梨三阿那盧四那履

五狗那履六

(已)三歎

世尊。以是神呪擁護法師。我亦自當擁護持是經者。令百由旬內無諸衰患。

(戊)四持國三初請。二說。三歎

(已)今初

爾時持國天王在此會中。與千萬億那由他乾闥婆衆恭敬圍繞。前詣佛所。合掌白佛言。世尊。我亦以陀

羅尼神呪擁護持法華經者。

(已)二說

卽說呪曰。阿伽禰一伽禰二瞿利三乾陀利四旃陀

利五摩蹬音鄧者六常求利七浮樓莎梶八頴底九音

(已)三歎

世尊。是陀羅尼神呪。四十二億諸佛所說。若有侵毀此法師者。則爲侵毀是諸佛也。

(戊)五羅刹女五。初列名同請。二說。三歎。四誓。五印。

(己)今初

雨時有羅刹女等。一名藍婆。二名毗藍婆。三名曲齒。四名華齒。五名黑齒。六名多髮。七名無厭足。八名持瓈。九名臯帝。十名奪。一切衆生精氣。是十羅刹女與鬼子母。并其子及眷屬。俱詣佛所。同聲白佛言。世尊。我等亦欲擁護讀誦受持法華經者。除其衰患。若有伺求法師短者。令不得便。

(己)二說

天王五比丘中興千萬齋僧由沙門會

卽於佛前而說呪曰。伊提履一。伊提泥二。伊提履三。

阿提履四。

伊提履五。

泥履六。

泥履七。

泥履八。

泥履九。

泥履十。

樓醯十一。

樓醯十二。

樓醯十三。

樓醯十四。

多醯十五。

多醯十六。

兜醯十七。

兜醯十八。

兜醯十九。

(己)三歎

寧上我頭上。莫惱於法師。若夜叉。若羅刹。若餓鬼。若富單那。若吉蕪。若毗陀羅。若犍馱。若烏摩勒伽。若阿跋摩羅。若夜叉。吉蕪。若人。吉蕪。若熱病。若一日。若二日。若三日。若四日。若至七日。若常熱病。若男形。若女

1 2 3 4 5 6 7 8 9 10 1 2 3 4 5 6 7 8 9 10 1 2 3 4 5 6 7 8 9 10

形若童男形。若童女形。乃至夢中。亦復莫憚。卽於佛前而說偈言。若不順我。呪惱亂說法者。頭破作七分。如阿梨樹枝。如殺父母罪。亦如壓油殃。斗秤欺詐人。調達破僧罪。犯此法師者。當獲如是殃。

毘陀羅。赤色鬼。犍陀。黃色鬼。烏摩勒伽。烏色鬼。阿跋摩羅。青色鬼。阿梨樹枝墮地。法爾破爲七片。殺父殺母破僧是五逆之三。壓油殃者。西國壓油擣麻使生蟲。然後壓之。汁多而肥。此殺業之尤。斗秤欺詐人者。出用輕小。入用重大。此盜業之尤。故有

震銘其背者。罪惡亦不輕也。

(巳)四誓

諸羅刹女說此偈已。白佛言。世尊。我等亦當身自擁護受持讀誦修行是經者。令得安隱離諸衰患。消衆毒藥。

(巳)五印

佛告諸羅刹女。善哉善哉。汝等但能擁護受持法華名者。福不可量。何況擁護具足受持供養經卷。華香。瓔珞。末香。塗香。燒香。幡蓋。伎樂。然種種燈。酥燈。油燈。

諸香油燈酥摩那華油燈簷葡萄華油燈婆師迦華油燈優鉢羅華油燈。如是等百千種供養者。臯帝汝等及眷屬應當擁護如是法師。

### 三請以呪護竟

#### ①四聞品得益

說是陀羅尼品時。六萬八千人得無生法忍。釋陀羅品呪護竟。次釋妙莊嚴王本事品。妙莊嚴王本事品第二十七。

此因緣出他經。昔佛末法。有四比丘于法華經極

生殷重。始則研求未悟。結契入山。既又助道艱難。不能專志。其一人云。吾等四窮。尚不存身法將安寄。君三人者。但以命奉道。莫慮朝中。我當捨此身力誓給所須。於是三人得展其誠。功超累劫。而此一人數涉人間。道力未固。偶逢王駕。羨彼光榮。福利所資。隨念受報。人中天上。常得爲王。享受旣久。漸起過患。三人以道眼見之。議共濟度。知其著欲。兼復邪見。若非愛鉤。無由可拔。故一爲其婦。二爲其子。具如今經所明。婦卽妙音菩薩。王卽華德菩

1 2 3 4 5 6 7 8 9

10 1 2 3 4 5 6 7 8 9

80 1 2 3 4 5 6 7 8 9

薩二子卽是藥王藥上妙音處處弘經藥王說。呪護法流通妙典四聖功深。說彼前緣故名妙莊嚴本事品也。世界又妙莊嚴者妙法功德莊嚴六根也。此王往日與妙法有緣道熏時熟諸根應淨生雖未獲其理必臻故靈瑞感通嘉名早立例如善吉雖未無諍已號空生下文云八萬四千歲精進修行妙法華經得一切淨功德莊嚴三昧以是義故名爲妙莊嚴也嘉名早立是對治得三昧是第一義本迹者迹則當時一凡三聖本則四皆是大菩薩爲欲

引導彼時眷屬及諸衆生故也觀心者于諸見不動而通達正見統御無外名爲妙莊嚴王

丙約化他勸流通中四明人護六初明事本二雙標所化能化三明能化方便四明所化得益五  
結會古今六聞品悟道丁今初

爾時佛告諸大衆乃往古世過無量無邊不可思議阿僧祇劫有佛名雲雷音宿王華智多陀阿伽度阿羅訶三藐三佛陀國名光明莊嚴劫名喜見  
丁二雙標所化能化

彼佛法中有王。名妙莊嚴。其王夫人名曰淨德。有二子。一名淨藏。二名淨眼。是二子有大神力。福德智慧。久修菩薩所行之道。所謂檀波羅蜜。尸羅波羅蜜。羼提波羅蜜。毗離耶波羅蜜。禪波羅蜜。般若波羅蜜。方便波羅蜜。慈悲喜捨。乃至三十七品助道法。皆悉明了通達。又得菩薩淨三昧。日星宿三昧。淨光三昧。淨色三昧。淨照明三昧。長莊嚴三昧。大威德藏三昧。於此三昧。亦悉通達。

王是所化。夫人二子是能化也。別顯二子功德。大

神力是如來衣。大福德是如來室。大智慧是如來一座。六度加方便爲七。或于權慧開出方願力智。則爲十度。今但云方便。卽攝餘三。慈悲喜捨。是四無量心。三十七品。有經名爲正道。以其是慧行故。此中指爲助道。以七科豎入故。意指十度。以爲正道。然圓教十度。四等三十七品。並是稱性。無作妙道。非正非助。一往隨義。名正助耳。禪中具有三昧。道品中亦節節有三昧。今更標七三昧名。皆是隨用立名。其理不異也。圓離三垢。名淨三昧。實智如意。

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43 44 45 46 47 48 49 50 51 52 53 54 55 56 57 58 59 60 61 62 63 64 65 66 67 68 69 70 71 72 73 74 75 76 77 78 79 80 81 82 83 84 85 86 87 88 89 90 91 92 93 94 95 96 97 98 99 100

權智如星。權實不二。名日星宿三昧。性淨發光。名淨光三昧。普現色身。名淨色三昧。性淨光明照了。諸法名淨。照明三昧。示現莊嚴長時。不滅名長莊嚴三昧。十力威德含攝。諸法名大威德藏三昧。

(丁)三明能化方便三。初時至。五論議。三現化。

量今初

爾時彼佛欲引導妙莊嚴王及愍念衆生故。說是法華經。

彼佛出世。常宣正法。觀于王及衆生機熟時至。乃

說是法。說是法華。卽王得度時至。故也。

(戊)二論議

時淨藏淨眼二子。到其母所。合十指爪掌白言。願母往詣雲雷音宿王。華智佛所。我等亦當侍從。親近供養禮拜。所以者何。此佛於一切天人衆中。說法華經。宜應聽受。母告子言。汝父信受外道深著婆羅門法。汝等應往白父。與共俱去。淨藏淨眼合十指爪掌白母。我等是法王子。而生此邪見家。母告子言。汝等當憂念汝父爲現神變。若得見者。心必清淨。或聽我等。

往到佛所。子白母時至。母讓令化父。子怨生邪見家。母責令憂念父。此約化儀機緣既熟應須發起故也。若據其本。則子母元知。若附世情。則母慈先白。若約利他。則慈復居先。並讚父一說天人衆中獨持華嚴  
五 ⑤ 三現化。首王華贊戒酒非華資來當持華嚴  
 於是二子念其父故。涌在虛空高七多羅樹。現種種神變。於虛空中行住坐卧。身上出水。身下出火。身下出水。身上出火。或現大身滿虛空中。而復現小。小復

現大。於空中滅。忽然在地。入地如水。履水如地。現如是等種種神變。令其父王心淨信解。

三明能化方便竟。並讚父一說天人衆中獨持華嚴

① 四明所化得益十。初信子伏師。二白母求出家。三重催見佛。四敍歎功德。五俱詣佛所。六佛授王記。七出家修行。八稱歎二子。九佛述行高。十文讚佛自誓。並今初華贊戒酒非華資來當持華嚴

時父見子神力如是。心大歡喜。得未曾有。合掌向子言。汝等師爲是誰。誰之弟子。二子白言。大王。彼雲雷

1 2 3 4 5 6 7 8 9 10 1 2 3 4 5 6 7 8 9 10 1 2 3 4 5 6 7 8 9 10

昔宿王華智佛。今在七寶菩提樹下法座上坐。於一切世間天人衆中廣說法華經。是我等師。我是弟子。父語子言。我今亦欲見汝等師。可共俱往。

王昔信受外道所覩邪變。不過或一或二。狹而且陋。故今見子所作。信伏其師而求見也。

(戊)二白母求出家

於是二子從空中下。到其母所。合掌白母。父王今已信解。堪任發阿耨多羅三藐三菩提心。我等爲父已作佛事。願母見聽於彼佛所出家修道。爾時二子欲

重宣其意。以偈白母。願母放我等出家作沙門。諸佛甚難值。我等隨佛學。如優曇鉢華。值佛復難是。脫諸難亦難。願聽我出家。母卽告言。聽汝出家。所以者何。佛難值故。

具足詣三千大千世界本實相之卦

一父王已信。宮中八萬四千又熟。故白母。稱慶。願求出家。而母亦聽之也。

(戊)三重催見佛

於是二子白父母言。善哉父母。願時往詣雲雷音宿王華智佛所。親近供養。所以者何。佛難得值。如優曇

鉢羅華。又如一眼之龜值浮木孔。而我等宿福深厚。生值佛法。是故父母當聽我等令得出家。所以者何。諸佛難值。時亦難遇。

一眼龜者。約事祇是譬難值耳。若約表法。凡龜魚之眼。兩向看之。既云一眼。則所見非正。在生死海。而又有邪見。何能值于佛法浮木實諦之孔。

庚四敘歎功德。果母時普吉羅蓋山。渠演以次。彼時妙莊嚴王後宮八萬四千人。皆悉堪任受持是法華經。淨眼菩薩於法華三昧久已通達。淨藏菩薩

已於無量百千萬億劫通達離諸惡趣三昧。欲令一切衆生離諸惡趣故。其王夫人得諸佛集三昧能知諸佛秘密之藏。二子如是以方便力善化其父令心信解。好樂佛法。參見百千萬億劫通達離諸惡趣三昧者。九界三惑以爲能趣。二種生死以爲所趣。圓道正定乃能離之。卽二十五王三昧圓破。二十五有也。佛集三昧者。二德秘密之藏。佛集其中。唯佛行處也。

1 2 3 4 5 6 7 8 9 10 1 2 3 4 5 6 7 8 9 10 1 2 3 4 5 6 7 8 9 10

## (戊)五俱詣佛所聞法供養見瑞歡喜

於是妙莊嚴王與羣臣眷屬俱淨德夫人與後宮采女眷屬俱其王二子與四萬二千人俱。一時共詣佛所到已頭面禮足繞佛三匝郤住一面爾時彼佛爲王說法示教利喜。王大歡悅爾時妙莊嚴王及其夫人解頸真珠瓔珞價直百千以散佛上於虛空中化成四柱寶臺臺中有大寶牀敷百千萬天衣其上有佛結跏趺坐放大光明爾時妙莊嚴王作是念佛身希有端嚴殊特成就第一微妙之色。

成就第一微妙之色猶龍女所讚微妙淨法身真相三十二也已悟色之實相故佛旋與授記

## (戊)六佛授王記

時雲雷音宿王華智佛告四衆言汝等見是妙莊嚴王於我前合掌立不此王於我法中作比丘精勤修習助佛道法當得作佛號娑羅樹王國名大光劫名大高王其娑羅樹王佛有無量菩薩衆及無量聲聞其國平正功德如是

## (戊)七出家修行

其王卽時以國付弟。與夫人二子并諸眷屬於佛法中出家修道。王出家已於八萬四千歲常勤精進修行妙法華經。過是已後得一切淨功德莊嚴三昧。

(戊) 八稱歎二子

卽升虛空高七多羅樹而白佛言世尊此我二子已作佛事以神通變化轉我邪心令得安住於佛法中得見世尊此二子者是我善知識爲欲發起宿世善根饒益我故來生我家

(戊) 九佛述行高

爾時雲雷音宿王華智佛告妙莊嚴王言如是如是如汝所言若善男子善女人種善根故世世得善知識其善知識能作佛事示教利喜令入阿耨多羅三藐三菩提大王當知善知識者是大因緣所以化導令得見佛發阿耨多羅三藐三菩提心大王汝見此二子不此二子已曾供養六十五百千萬億那由他恒河沙諸佛親近恭敬於諸佛所受持法華經愍念邪見衆生令住正見

善知識有三一外護二同行三教授也又有三一

諸佛菩薩。二道品六度。三實際實相。六種知識。皆能作于佛事。教授及佛菩薩二種。則能示教利喜。教授同行及諸菩薩三種。則能化導令得見佛。實相實際。則能令人菩提。此六並有全力。並不可缺。故云是大因緣。

(戊)十讚佛自誓

妙莊嚴王。卽從虛空中下。而白佛言。世尊。如來甚希有。以功德智慧。故頂上肉髻光明。顯照其眼長廣。而紺青色。眉間毫相。自如珂月。齒白齊密。常有光明。脣色赤好。如頻婆果。爾時妙莊嚴王讚歎佛。如是等無量百千萬億功德已。於如來前。一心合掌。復白佛言。世尊。未曾有也。如來之法。具足成就。不可思議微妙功德。教戒所行。安隱快善。我從今日。不復自隨心行。不生邪見。憍慢瞋恚諸惡之心。說是語已。禮佛而出。深達實相。故外欽佛德。內革己心。如悟冰水。同一濕性。以湯消冰。永不凝結也。四明所化得益竟。

(丁)五結會古今

佛告大衆。於意云何。妙莊嚴王。豈異人乎。今華德菩

薩是其淨德夫人。今佛前時放光照于東方所召之莊嚴相菩薩是哀愍妙莊嚴王及諸眷屬故於彼光明莊園土中生其二子者。今藥王菩薩藥上菩薩是是藥王藥上菩薩成就如此諸大功德已於無量百千萬億諸佛所植衆德本成就不可思議諸善功德若有人識是二菩薩名字者一切世間諸天人民亦應禮拜

①六聞品悟道

佛說是妙莊嚴王本事品時八萬四千人遠塵離垢於諸法中得法眼淨

於諸法中得法眼淨卽徧照三千相性假實諸法通達無滯無染著也或是分證或是相似後心二約化他勸流通竟

②三約自行勸流通

普賢菩薩勸發品第二十八

梵音鄭輪威陀大論觀經皆譯徧吉此經譯爲普賢普卽徧義賢卽吉義等覺居衆伏之頂伏道周徧故名爲普斷道將盡所較無幾鄰終際極故名爲賢如十四夜月鄰似十五夜月也大佛頂經云

## 法華會第十六

四十五

我用心聞。分別衆生所有知見。若於他方恒沙界外。有一衆生心中發明普賢行者。我乘六牙象。分身百千皆至其處。縱彼障深未得見我。我與其人暗中摩頂。擁護安慰。令其成就。今言勸發者。戀法之辭。遙在彼國。其聞此經始末既周。欲令自行化他。永無已故。自東而來。更請正說。勸發自行。更請流通。勸發化他。復以誓願而總勸發。文具四悉檀意。我爲供養法華經故。自兜其身。若見我身甚大歡喜。世界悉也。以見我故。轉復精進。卽得三昧。

及陀羅尼爲人悉也。無有非人能破壞者。亦復不爲女人惑亂。對治悉也。刹塵菩薩具普賢道第一義悉也。以此四悉檀因緣故。來勸發上判流通。文爲三神力囑累二品。正明付囑流通。藥王下五品舉菩薩化道力大以勸流通。今此一品舉普賢誓願力大以勸流通也。文分爲四。初發來。二勸發。三述發。四發益。

(丙)初發來三。初上供。二下化。三修敬

(丁)今初

爾時普賢菩薩以自在神通力。威德名聞。與大菩薩

無量無邊不可稱數。從東方來。所經諸國。普皆震動。  
雨寶蓮華。作無量百千萬億種種伎樂。

自在是理。一神通是行。一威德是人。一名聞是教。  
一又自在是常。神通是樂。威德是我。名聞是淨。言  
說如此。節一而四。德無不備也。威德故震動。名聞  
故雨華。神通故作樂。自在故隨動隨雨。隨作。譬如  
大龍飛行。雲雨流起。此是心力。法力。衆生力。應化  
力。不思議力所致。以此四德。妙力遠來。勸發四一。  
所經歷處。自行上供。其事如此。問。華嚴明普賢菩  
薩依真而住。非國土。今何故云從東方來。答。彼經  
顯示所證自體。此經且據應迹所從。夫真如法性。  
初住已能分證。何況普賢。應迹所從多寶。亦云東  
方。又何況普賢。若知真性之外。無國土。則知國土  
之外。亦非別有真可住矣。

①二下化

又與無數諸天龍夜叉乾闥婆阿修羅迦樓羅緊那  
羅摩曇羅伽人非人等大眾圍繞。各現威德神通之  
力。

隨他所宜現八部像。主伴並其四德舉二攝二。故云各現威德神通之力。當知所隨皆法身也。又與大菩薩是示現實功德。與諸八部是示現權功德。權實並具四德。並有上供下化二意。

(丁)三修敬

到娑婆世界者。閻崛山中。頭面禮釋迦牟尼佛。右遶七匝。

初發來竟

(丙)二勸發二。初請問勸發。二誓願勸發。(丁)初中

一一。初問。二答。(戊)今初

白佛言。世尊。我於寶威德上王佛國。遙聞此娑婆世界說法華經。與無量無邊百千萬億諸菩薩衆。共來聽受。惟願世尊當爲說之。若善男子。善女人。於如來滅後。云何能得是法華經。

當爲說之。更請正說。流通之要旨也。云何能得是經。謂得正說。流通之妙解也。請正說。是勸發自行。請流通。是勸發化他。欲令妙法光流無極。乃懲法無已之極思也。

## (戊)二答

佛告普賢菩薩。若善男子。善女人。成就四法。於如來滅後。當得是法華經。一者爲諸佛護念。二者植衆德本。三者入正定聚。四者發救一切衆生之心。善男子。善女人。如是成就四法。於如來滅後。必得是經。

普賢菩薩旣雙請正說流通。今佛亦以四法而雙答之。先答正說者。開權顯實也。佛于衆生雖復大慈平等普度。而諸衆生迷背法性。如覆盆之下。自隔日光。若能遠惡界。世從善人返迷治對歸悟第一開義。

衆生知見顯佛知見者。則稱可聖心。是爲諸佛護念。身法若佛知見開。則般若。是爲植衆德本。亦卽不亂不昧。不取不捨。是爲入正定聚。般若亦卽上合慈力。下同悲仰。是爲發救衆生之心。解脫當知四法。祇是開權顯實。證圓三德也。又諸佛護念。是開佛知見植衆德本。是示佛知見入正定聚。是入佛知見發救生心。是悟佛知見。迹門之要此四收矣。又迹則有本。從本三德。故有迹中三德。從本開示悟入。故有迹中開示悟入。今開迹卽顯本。本迹無

二無別。故以四法答其請正說也。次答流通者。流通之要唯三唯四。今諸佛護念入正定聚。卽著如來衣。植衆德本。卽坐如來座。發救生心。卽入如來室。又諸佛護念卽身安樂行。植衆德本。卽口安樂行。入正定聚。卽意安樂行。發救生心。卽誓願安樂行。故以四法答其請。流通也。一答酬其兩請。舉四冠冕一經。遠來勸發其義。如此能行四法。必解經體。故云必得是經。此結成正說之請。也能運此解傳與他人。他人得此信解。成初依人。若得真解。成

第二第三第四依人。此結成流通之請也。初請問勸發竟。

(丁)二誓願勸發二。初誓願護人。二誓願護法。(戊)

初中六。初攘其外難。二教以內法。三覆以神力。四示勝因。五示近果。六總結勸。○(己)今初

爾時普賢菩薩白佛言。世尊。於後五百歲。濁惡世中。其有受持是經典者。我當守護除其衰患。令得安隱。使無伺求得其便者。若魔若魔子。若魔女。若魔民。若爲魔所著者。若夜叉。若羅刹。若鳩槃茶。若毘舍闍。若

0 1 2 3 4 5 6 7 8 9 10 11 12 13 14 15 16 17 18 19 20

吉蔭若富單那。若韋陀羅等諸惱人者皆不得便  
韋陀羅王厭禱鬼也。此翻善妙。

(已)二教以內法又三。初行立讀誦。二若坐思惟。三  
三七精進。(庚)今初

是人若行若立讀誦此經我爾時乘六牙白象王與  
大菩薩衆俱詣其所而自現身供養守護安慰其心  
亦爲供養法華經故。

(庚)二若坐思惟

是人若坐思惟此經爾時我復乘白象王現其人前

其人若於法華經有所忘失一句一偈我當教之與  
共讀誦還令通利爾時受持讀誦法華經者得見我  
身甚大歡喜轉復精進以見我故即得三昧及陀羅  
尼名爲旋陀羅尼百千萬億旋陀羅尼法音方便陀  
羅尼得如是等陀羅尼。

旋者旋假入空也。百千萬億者旋空入假也。法音  
方便者二爲方便得入中道第一義也。

(庚)三三七精進

世尊若後世後五百歲濁惡世中比丘比丘尼優婆  
塞尊若富單那若韋陀羅等諸惱人者皆不得便

1 2 3 4 5 6 7 8 9 10 1 2 3 4 5 6 7 8 9 10 1 2 3 4 5 6 7 8 9 10

塞優婆夷求索者受持者。讀誦者書寫者。欲修習是法。華經於三七日中。應一心精進。滿三七日已。我當乘六牙白象與無量菩薩而自圍繞。以一切衆生所喜見身現其人前而爲說法。示教利喜。亦復與其陀羅尼呪。得是陀羅尼故。無有非人能破壞者。亦不爲女人之所惑亂。我身亦自常護是人。惟願世尊聽我說此陀羅尼呪。卽於佛前而說呪曰。

阿檀地一檀陀婆地二檀陀婆帝三檀陀鳩舍隸四檀陀修陀隸五修陀隸六修陀羅婆底七佛陀波擅

補八薩婆陀羅尼阿婆多尼九薩婆婆沙阿婆多尼十修阿婆多尼十一僧伽婆履叉尼十二僧伽涅伽陀尼十三阿僧祇十四僧伽婆伽地十五帝隸阿憍僧伽兜略盧切阿羅帝波羅帝十六薩婆僧伽地三摩地伽蘭地十七薩婆達磨修波利刹帝十八薩婆薩埵樓駄橋舍略阿嵬伽地十九辛阿毗吉利地二十

二教以內法竟

(巳)三覆以神力

世尊若有菩薩得聞是陀羅尼者。當知普賢神通之

力。若法華經行闇浮提有受持者。應作此念。皆是普賢威神之力。

(已)四示勝因

若有受持讀誦正憶念解其義趣如說修行當知是人行普賢行於無量無邊諸佛所深種善根爲諸如來手摩其頭

行普賢行同未來佛得脫也深種善根於過去佛得種也手摩其頭爲現在佛所熟也

(乙)五示近果

若但書寫是人命終當生忉利天上是時八萬四千天女作衆伎樂而來迎之其人卽著七寶冠於采女中娛樂快樂何況受持讀誦正憶念解其義趣如說修行若有人受持讀誦解其義趣是人命終爲千佛授手令不恐怖不墮惡趣卽往兜率天上彌勒菩薩所彌勒菩薩有三十二相大菩薩衆所共圍繞有百千萬億天女眷屬而於中生有如是等功德利益

但能書寫近生忉利具五法師能生兜率得爲補處眷屬也問何不生安樂土耶答若發淨願則隨

一其觀行淺深。生四種安樂土。不發淨願。則隨其五品功成。生兜率也。

(已)六總結勸

是故智者應當一心自書。若使人書。受持讀誦。正憶念。如說修行。幹本朝無時。其美惡事人。亦發我子初發願護人竟。  
(戊)二誓願護法。幹本朝無時。其美惡事人。亦發我子世尊。我今以神通力故。守護是經。於如來滅後。間浮提內。廣令流布。使不斷絕。

二勸發竟

(丙)三述發二。初先述護法。二述護人。

(丁)今初

爾時釋迦牟尼佛讚言。善哉善哉。普賢。汝能護助是經。令多所衆生安樂利益。汝已成就不可思議功德。深大慈悲。從久遠來。發阿耨多羅三藐三菩提意。而能作是神通之願。守護是經。我當以神通力守護能受持普賢菩薩名者。

聞法華經受持法華皆是普賢神力。聞普賢名。受持普賢名字。皆是如來神力。即兼述護人中第三。

覆以神力也

丁二述護人五。初述第二教以內法。二述第四示勝因。三述第五示近果。四述第一攘外難。五述總結勸 戊今初

普賢若有受持讀誦正憶念修習書寫是法華經者當知是人則見釋迦牟尼佛。如從佛口聞此經典當知是人供養釋迦牟尼佛。當知是人佛讚善哉當知是人爲釋迦牟尼佛手摩其頭當知是人爲釋迦牟尼佛衣之所覆

見釋迦佛不但見六牙白象普賢身也。從佛口聞

不但普賢共讀誦也。佛讚善哉手摩衣覆不但普賢呢護也。讚善是空座行成手摩是慈室行成衣覆是忍衣行成

戊二述第四示勝因

如是之人不復貪著世樂不好外道經書手筆亦復不喜親近其人及諸惡者若屠兒若畜猪羊雞狗若獵師若衒賣女色是人心意質直有正憶念有福德力是人不爲三毒所惱亦不爲嫉妒我慢邪慢增上

慢所惱。是人少欲知足能修普賢之行。

(戊)三述第五示近果

普賢。若如來滅後。後五百歲。若有人見受持讀誦法華經者。應作是念。此人不久當詣道場。被諸魔衆。得阿耨多羅三藐三菩提。轉法輪。擊法鼓。吹法螺。雨法雨。當坐天人大衆中。師子法座上。普賢。若於後世受持讀誦是經典者。是人不復貪求。假卧具。飲食資生之物。所願不虛。亦於現世得其福報。

當詣道場。必成遠果。何止忉利兜率之近果耶。雖

不貪著四事。亦於現世得其福報。何止命終方生

天耶。

(戊)四述第一攘外難

若有人輕毀之言。汝狂人耳。空作是行。終無所獲。如是罪報。當世世無眼。若有供養讚歎之者。當於今世得現果報。若復見受持是經者。出其過惡。若實若不實。此人現世得白癩病。若輕笑之者。當世世牙齒疎缺。醜脣平鼻。手脚繚戾。眼目角瞼。身體臭穢。惡瘡膿血。水腹短氣。諸惡重病。

佛廣示毀者之罪。令知過必改。不相惱亂。非但持經者難滅。亦乃欲毀者福生。無毀無難。彼此安樂。曠濟無偏慈之至也。

(戊)五述總結勸發竟。  
是故普賢若見受持是經典者。當起遠迎。當如敬佛。三述發竟。

(丙)四發益二。初聞品益。二聞經益。(丁)今初

說是普賢勸發品時。恒河沙等無量無邊菩薩。得百千萬億旋陀羅尼。三千大千世界微塵等諸菩薩。具

### 普賢道

一百千萬億旋陀羅尼。祇是法界差別智耳。具普賢道。是滿足十地。鄰極至聖也。

(丁)二聞經益

佛說是經時。普賢等諸菩薩。舍利弗等諸聲聞。及諸天龍人非人等。一切大會皆大歡喜。受持佛語作禮而去。

三事歡喜如前說。此中云何猶稱聲聞。乃經家存其本位耳。又經家稱其爲大乘聲聞。以佛道聲令

一切聞也

法華會義十六

五十七

妙法蓮華經台宗會義卷七之二

跋語

嗚呼。圓頓妙法。曠劫難逢。繫我愚蒙。何緣幸遭。每一披閱。恍若夙聞。豈非普賢威神之力。釋迦守護之功耶。智者大師不可復作。後賢堅執。圖諍滋生。圓融絕待。法門幾成。彼此是。非情見。弘之者城塹。益高益深。望之者疑畏。日新日盛。耳聞目擊。扼腕痛心。不揣疎庸。聊爲介紹。舉筆于己丑之十一月。

初五日甫成一序。病卧半月至十九日方得勉強從事。旦夕孳孳。手不停書。目不停閱。臘月二十六日僅完三卷。經文計得會義八卷。歇節三日。庚寅元旦。隨卽試筆。又歷一月。方得告成。共計會義一十六卷。足運心力六十八日。嗟嗟。曾聞古人一炷香中。卽能朗誦華嚴一部。而旭也根鈍。矻矻乃爾。亦可嗤矣。然以此誘接初學。令得漸悟法華實相。不終按劍。亦不望洋。則釋迦普賢及與智者皆必獲旭苦心也。夫庚寅仲春朔日已刻。閣筆故跋。

弟子常淨施銀貳兩奉薦先父錢仲義先母常沼同生淨土

弟子閔智筏募貲助刻頤與法界有情同悟大乘實相

四



60

1 2 3 4 5 6 7 8 9

70

1 2 3 4 5 6 7 8 9

80

1 2 3 4 5 6 7 8 9

1 2 3 4 5 6 7 8 9

十四